

忠

肅

集

附拾遺

四



忠 肅 集
附 拾 遺
(四)

劉 摯 撰

中華民國二十五年六月初版

平

忠

撰者

劉

摯

肅

發行人

王

上海河南路

五

王雲五主編
叢書集成初編

附 拾 遺
四 冊

印刷所

商

上海河南路
商務印書館

集

發行所

商

上海及各埠
商務印書館

(本書校對者沈抱秋謝雨東宮秀)

忠肅集卷十六

七言古詩

汶上送黃任道游吳

屑霜飛空木葉脫。長河波光碧玉滑。江南仙客厭塵埃。歸夢寥寥向吳越。故溪時到春未還。正是梅花弄香雪。太湖寺下吟新詩。姑蘇臺邊醉寒月。江橙甘熟霜夜酣。吳酎香醅凍醅撥。遼東歸鶴悲是非。鍾阜曉猿驚契闊。嗟予不得從之行。兀若孤鷹歎韝絀。東南山水游子多。航深屐險無時絕。去非賈道百不一。寂無風詠十常八。君提吟筆尋鄉邦。詞源浩若天潢決。形容物象空鼇峯。搜摛祕怪窮禹穴。人生難足惟勝游。意適何勞計窮達。崢嶸歲律南浦寒。早晚歸艎櫓聲軋。不獨孤陋勤所思。雙白應須念親髮。

秋收

農家之富秋始見。十色田利皆豐登。擔贏車載上場圃。環舍隱積如高陵。園蔬林果不足數。山雉野兔霜未增。連村簫鼓謝神貺。穀黍換酒無斗升。田家之樂豈不好。胡爲不歸邀我朋。榜舟梁澤稼汶北。咄哉反此如韓鷹。

祖日陪祀渚宮退作長句呈聖鄰屯田

楚鄉地薄氣不密。寒燠開閉無春冬。盛陽不効二月尾。日夜霰雪雨以風。社壇汗潦害展祀。奠獻蕝席移渚宮。層臺大廈禮少變。餽羊不去精享通。須臾已事雲解駁。象緯落落天曠曠。起憑危欄久顧望。肅然羽翼開愁胸。恍疑身世此何地。蓬瀛岌岌三山宮。平湖無波萬籟息。但見橋影僵雙虹。豈無林花與嘉木。蕩搖摧折今一空。枝頭尖纖卷寒綠。水面狼籍浮殘紅。荊州獨此號勝地。經年未始來其中。黃綠陪祀幸一至。豈期端值青春窮。嗟吾老去少懽緒。況乃人事多忽忽。與君卻作避暑約。解衣岸幘看雲峯。攜壺挾策無不可。此樂豈特春游同。

送客渚宮歸至學舍覽君佩獨登城樓詩次韻奉和

淵明田蕪猶未歸。胡爲簿領甘沈迷。樂時選勝豈無意。政值一春風雨淒。但宜夜几守黃卷。酸寒擁鼻燈火低。盛陽充發破陰沴。幾日天氣回慘淒。朝來送客過楚渚。平湖綠淨凝玻瓈。乍驚物象豁塵眼。亦有亭榭堪攀躋。草光浮浮古岸北。花氣靄靄層臺西。盃盤共坐蔭清樾。歌笑起行循大堤。鳬雛鷺子漾淺曲。絕勝乳燕巢深閨。幽尋踽踽不自覺。城陰步滑猶春泥。心閒漫隨流水遠。境靜卻增幽鳥啼。何時短艇弄明月。安得巨筆凌長霓。歸來學舍坐搔首。外物何足干天倪。闊疏但愧事業淺。剛褊分與時俗睽。如君年少喜學問。青雲萬里端可梯。城頭新篇真自得。豈假朋友相招攜。我亦林泉偶尋勝。因君成詠初無題。登高能賦子之職。敢以城闕譏挑兮。

承牒荆門呈諸友

方城道中詩墨新。〔原注〕澤民近沿牒。方城有詩。荆門山下有行人。同盟邇來無髣髴。傍馬欲去尙逡巡。荆門西行一百里。玉泉之境天下聞。諸君不能伴康樂。請賦黃鵠飛秋雲。

次韻王潛江馬上長句因招之

雙鳬飛下王喬縣。別後緒言談未遍。君能有意齊是非。吾久無心恥貧賤。青袍塵滿高情倦。急索歸鞭重增眷。陶家池榭雖所懷。楚渚林亭應未見。

題致政朱郎中适園林

南宮仙郎綠髮翁。歸來甲第荆城中。翁家祖世有名德。至今孫子傳清風。園亭繼繼事營治。增華到此窮智工。鋪張百物各有職。崢嶸一界疑壺宮。清明過去春事老。林叢暗綠陰相通。朱欄曲檻巧暉映。曉風夜露香溟濛。溪魚野鳥樂晴昊。碧蘿怪石依長松。方池清泚雖可濯。主人纓上塵久空。年年三日縱士女。觀遊思與鄉人同。及時娛樂日月邁。肯使蟋蟀悲晉公。閣書深藏一萬軸。牙籤錦帶嚴編封。脫巾解屣游覽倦。燕坐自有黃卷功。三年羈客偶幸至。歸來搔首嗟蒿蓬。生涯適意最難事。安用勲業銘鼎鐘。鄉人勿笑翁不出。門外勢利方憧憧。

贈穆道士

離石道士心跡閒。學行已老猶少年。昔游京師友豪貴。聲名成就來淮山。恬然頗已厭俗累。靖館嚴密諸新安。朝真香火儼畫殿。步虛聲謠鏗夜壇。六甲星辰逆禍福。一鱣龍虎誰神仙。北州有客性疏野。誤爲世

網相拘牽。時來與子款譚。晤閒心慰。愜愁病蠲。曾將出處大計說。聞吾至論。領曰然。東風滿江春。潏潏孤帆。曉掛荊州船。他年會合未可約。訪子應在蓬萊顛。

次韻晉陵吳秀才傳見貺

道卿詩思清如水。披衣霜夜吟寒星。意深調苦悲萬古。平明寄與鍾子聽。北牕病客爽心骨。若飲甘露枯腸盈。嗟夫世故玩形器。智者營役奔風霆。區畛大小各爾志。不可慕者鴻冥冥。吾于世紛粗有覺。未逢燭理瘖不鳴。短篇講好聊寫意。弱趙安敢當秦兵。

小孤山

萬山逶迤起彭澤。齊驅擁立江東隅。水西平地曠千里。惟此一峯高且孤。氣嚴勢峭鬱獨立。意不與彼爲朋徒。夾水對峙寡常衆。衆色媿慘驚頑麤。天公結融若有意。以此壯我淮甸無。青天長劍倚千丈。碧玉大筍巍一株。古今畫工昧好惡。峨眉雁蕩爭爲圖。方言訛傳楚俗鬼。立廟更以孤爲姑。我行不暇諭父老。正是北風吹舳艫。

自福嚴至後洞記柳書彌陀碑

一孟僧粥三鳴雞。漸望天角生晴曦。積陰凝靄不得肆。蕩滌破散爭紛披。清明物象各有職。如再開關平艱危。游人襟韻廓以喜。遠指後洞都忘疲。小楚亭北望明滅。宛宛一徑微如絲。問云般舟道場路。從此亭背無險巖。寺久荒寂無足往。念有子厚彌陀碑。獨趨一里轉巖腹。剝粉敗赤逢門楣。村童開關語嘲嗜。似

云乞米僧未歸。亭亭故碑立青玉。覆以老屋疏且敝。常嗟古人不可見。尙喜書法存于斯。世言書字出心畫。體制類彼人所爲。子厚少年頗疏雋。字合飄逸狂不羈。胡爲氣質反端厚。至今觀者多有疑。或云彼以竄逐久。氣志軟熟非前時。又云高才尙薄世。故獨立法無所師。吾嗟世俗日無理。好惡不正論苦卑。臆決萬事豈獨此。此書何媿人不知。碑陰三百四十字。疏瘦勁麗何精奇。九十三人姓名具。陳續寶歷元年題。云此柳書一碑者。元和三年刊厥辭。至是二月始建立。都其事者楊與倪。塵蒙壁礙世未見。自我訪尋初愛之。嗟物晦顯似有數。恨不從事氈與槌。巉巖西山邃無數。行及二寺方晨炊。東南谿磴斗孤絕。下及平壑如懸梯。南朝佛子謂慧海。卜庵于此存遺基。鬼神饋食以車運。石崖轍跡如在泥。智不足以盡萬物。敢決真僞論是非。老僧夜語亦有理。明發策杖猶遲遲。

代書寄文瑩道人

白雲孤起飛杳冥。光如片玉輕如冰。出山歸山兩何意。行止偶然無滯凝。故人浮舟數百里。得得訪我湘江稜。二十年間四相遇。重顛疏鬢霜各增。寒齋笑語極微妙。共以身世均鷗鵬。瞥然去矣不我告。振錫忽借南風乘。聊一徘徊駐衡嶽。遂能放意窮臨登。崔嵬老骸不知倦。軟輿蠟屐勤躋升。窮巖險谷訪祕怪。往往清嘯猿鳥驚。長泉落石響寒玉。故意寫在朱絲繩。仰揮雲煙斂羽翼。俯聽譽毀真蚊蠅。書來所說謂如此。而惜攜手無友朋。又云吾廬已堪唾。況彼城市尤足憎。意若欺我在遷謫。故以勝事用夸矜。嗟如予者安足道。進退大計兩未能。平生雅志在林壑。誤落世紛親繳贈。悲吟黃鵠慕越客。謝病高居思茂陵。羨子

徜徉類雲鶴。顧我拘窘如韓鷹。故應題詩遍崖壁。曷若寄我勤緘滕。山童癡立索書去。寫此安足傾愁膺。春日述懷

祥風靈雨過二月。陳根新種苗爭抽。早蠶生齊漸如蟻。溫飽指此無歲憂。春酒未盡社已過。節物又近清明頭。茜裙纈袖事來往。方盤小榼相餉酬。田家之樂世皆慕。貴仕難去賤易謀。行矣請謝茂陵病。一廛未歸先疇。

崔仲岳鶴舟

綠髯滿頰光且修。紫石雙眼寒鉞浮。茫然襟韻自軒豁。見于聲貌非懦柔。昔隨羣衆退禮部。歸來便作滄浪遊。笑買漁艇出巧思。飾以丹白名鶴舟。長鬚赤脚分相與。鱸魚美酒他何求。高吟清風洞庭晚。一笛明月吳江秋。白雲無心伴疏散。丹經有訣窮秘幽。志非謗國慕處士。性欲避俗追浮邱。不山不淵隱無跡。時時飛棹來皇州。保康橋前臙清夢。峨冠爛醉都城樓。胸中有物齊出處。天下無方隨去留。太平取士有階陛。幾人年少能公侯。公侯未有君所樂。一時外物爲贅疣。束之簪紳豈其性。軋以利害仍相矛。嬾糲稻粱効雞鶩。馳逐羶穢爭蚍蜉。相逢感慨慕黃鶴。嗟我方以斗祿囚。賤官藍綬誰不爾。應書隨俗卑可羞。鶴舟之樂慎勿棄。勸君起者非良謀。(原注) 諸公詩勸君棄鶴舟就以舉。故云云。

虞城早起道中寄公秉幕府諸友

屋角一夜羣枯號。曉來曠野風如刀。峨峨殘雪路摧馬。格格寒氣冰生袍。四支僵痺非我有。況彼鞭鞅難

持操。天東朝日凍應澀。亦戀陽谷猶深韜。居常誰不事行役。我行適此時令遭。因思都府盛僚友。人物一
一皆賢豪。想今酣寢夢方足。初離密幄驚寒朝。左承右侍各以職。氣語蘭臭顏如桃。奉持巾匣事盟櫛。傳
唇澤面供香膏。不容髮綠一點變。亟以寶鑑爭除癬。炎爐卻坐日當卯。進酒爲壽傾葡萄。捋鬚束帶欲出
戶。問訊分付猶忉忉。體舒意適自穩暖。洋然盛氣虹霓高。此時豈復念寒旅。嗟我勞佚何相遼。入趨留守
退幕府。坐据大案臨諸曹。曹司進若魚在貫。文書盈抱紛牛毛。爭前鬪敏請莅職。研磨濃墨揮長毫。左手
鈐前右摘尾。落紙葉葉如翻濤。逢姓書字且不給。何暇可否知根巢。坐中耳目已煩困。庭下敲扑仍喧囂。
伏膺胝手腕疑脫。退食筆硯方能縈。乘除賴有此事在。庶幾可以均吾勞。人生誤落世網內。區區係累安
足逃。要之虛中日自靜。不使內外相鈎膠。無窮來物彼千萬。坐任變化無吾騷。崢嶸年華已適暮。不日春
意生蘭茝。一樽相與莫相放。天下萬事從滔滔。

還郭祥正詩卷

李杜酒死詩不作。風雅三百年來窮。世儒未必甘汨沒。才不迨志終無功。汾陽有人字功甫。歛然聲價來
江東。當時未冠人已識。知音第一惟梅翁。翁主詩盟世少可。一見旗鼓欣相逢。當友不敢當師禮。呼以謫
仙名甚隆。〔原注〕聖俞以右爲李白後身。故諸公皆以謫仙稱之。君亦自謂太白出。世姓雖異精靈同。姑
蘇江水瑩寒鑑。江上碧玉排羣峯。壯吟豪醉售佳境。日題百紙傾千鍾。折腰印綬豈所樂。養親斗粟曾未
充。蓬萊幽夢掛寒月。青山歸思隨飛鴻。書來寄我三巨軸。華絨開破溪雲封。駭然按劍覽珠璧。悸若赤手

勅蛟龍長吟千言短數百。造語險怪神爲工。四明賀老忽去世。伯牙悲愴聞焦桐。嗟予逢子衆人後。今其所得何最豐。前日過我北池上。正是清露沾高松。涼軒坐聽哆宏辯。瀑布千丈懸秋風。謫仙有此願自重。世俗酣象惟纖穠。彼其耳目不自信。滔滔誰樂聞鼓鐘。勿意雅頌興禮樂。一日鑒賞期至公。煌煌帝業子當頌。上歎慷慨空山中。

送蔡景繁赴淮南運使

新堤洛水東風護。下入長淮春浩渺。淮南使者蓬萊仙。疊鼓鳴鐃畫船曉。早時契闊慕聲名。晚歲綢繆親紵縞。磨鉛並直登瀛洲。對案同廳佐京兆。青蒿長松慙異質。流水高山喜同調。雖當倥偬喧囂時。不廢鱗鱗與吟嘯。歲月撲面來紛紛。冠蓋送客聲擾擾。北園去歲賦紅梅。南浦今春歌碧草。黃金龍節使光華。白面書生才縹緲。世高臺閣與省府。徧歷從容譽清劬。投虛餘刃無足爲。澄清百城付談笑。時行有命又有義。所遇何多亦何少。未應刻意懷軒裳。知有高情在魚鳥。黃鵠千歲凌長風。奈此沙邊老鷓鴣。朝廷羽儀重人物。行聞追鋒賜嚴召。玉音寄我其無忘。時有歸鴻下雲表。

酬寄

趙郎趁我弛擔初。爲寄肘後楊炎書。盈編專備瘴嶺病。仁及來世功誰如。城南老廬有別舍。我來埽榻成燕居。坐忘不復一念起。寸田自治何須鉏。養生防患不知此。從事方藥亦已疏。飛鳶未妨墮溪水。黃茅正使侵庭除。玄膺晨漱已可飽。脯膳況復餘米魚。聊將此書一過讀。寄語庶不憂鄉閭。

跋覽前此唱和詩卷有詩次其韻

窮不廢詩真技癢。筆研風雲日相向。聖賢發憤乃有作。三千餘篇自古上。荒城誰我同此聲。惟有哀猿嘯青嶂。窮人所作誠已難。平淡豐腴乃嘉唱。橫槊壯氣雖蕭蕭。擊鉢爭先猶行行。敢懷修門成怨騷。亦防飯顆嘲苦相。江湖千里山千重。朝夕供吟紛萬狀。閒適非以娛時人。可口甘酸勞醞釀。（案）後詩韻此處缺兩句大兒歸不開卷軸。喜我窮通心已忘。種瓜頗欲學東陵。醉尉亦從呵故將。古人能輕萬戶侯。爲有千篇相等量。

再作

何事勞心四愁望。側身泰山日東向。君子九夷猶可居。已謀築室金溪上。距江籃輿才兩舍。遠郭屏風列千嶂。門中翰墨傳風流。自爲師友相賡唱。曹氏聲名父子間。謝家文章弟兄行。古人至樂蓋在斯。得意未肯博公相。頓挫萬象歸毫端。雕刻丹青盡名狀。古風嚴重周廟鼎。小律軟美楚人釀。居人惻惻盈錦囊。游子篇篇出驚浪。苦心頗恨語不工。故實仍嗟老多忘。懣休豐鑠空據鞍。銳勇終輸少年將。主盟定霸益勉旃。少陵勳名何可量。

長句送跋之官斬水

前年東秦夏六月。望日拜恩初賜玦。降秩削職遷黃州。倉皇束裝三日發。故國東平不入城。北山一夜辭松栝。親朋問訊若夢寐。骨肉分留作胡越。論罪豈合有民社。抵巇正欲加鈇鉞。仇家之議不盡用。天地寬

仁日月察。纔令分司置之。斬上表謝恩。秋已末。以御魴魩乃其分。欲居蠻夷聖猶屑。斬也雖僻自善地。回環山溪富林樾。平生雅志在江湖。頗與斬人相締結。收拾孥屬已團聚。南北無心更分別。白魚煮玉杭煇珠。佐以秋菰與春蕨。築室求田雖未就。典衣賣裝略無闕。大謬不然心已忘。笑人非工已愈拙。人生端若夢栩栩。事去何庸書咄咄。大兒調邑換江南。要雖分房無遠別。地劣兩舍不宿舂。晨起爲書午可達。邑四萬戶號難治。民雜江閩吏貪猾。鋤強洗惡勿著意。魚逃至清人忌潔。化以誠心磨以久。教而後刑不怨殺。得聞無毀亦無譽。以慰蕭蕭雙白髮。

易元吉畫猿

櫺林秋葉青玉繁。枝間倒挂秋山猿。古面睢盱露瘦月。髭毛勻膩舒玄雲。老猿顧子稍留滯。小猿引臂勞攀援。坐疑跳躑避人去。彷彿悲嘯生壁間。巴山楚峽幾千里。寒巖數丈移秋軒。渺然獨起林壑志。平生願得與彼羣。吾知畫者古有說。神思爲易犬馬難。物之有象衆所識。難以僞筆淆其真。傳聞易生近已死。此筆遂絕無幾存。安得千金買遺紙。眞僞常與識者論。〔案〕此詩據聲畫集補入。

五言律詩

秋日縣齋

節物秋將半。疏慵日益加。不爲投劾去。徒有折腰嗟。味酒懷江鱖。乘風憶海槎。東籬滿涼露。已約伴黃花。

九日再招趙湜

夜露感庭鶴。秋風吹海槎。相思悲歲月。寂坐望雲霞。終夕孤蟾魄。重陽近落花。君無鄙貧令。金葉徧陶家。

和移居二首

作邑風流在新居。卜築完。清懽囊書入。小隱奉親安。日淡城樓曉。霜深園樹寒。吏塗何所得。試向靜中看。境物生新趣。蒿榛失舊墟。避塵深戶牖。待月廣階除。醉夢飛鴻外。吟懷晚雪餘。相思歲將晏。誰叩草玄居。

登徐州城樓

彭城樓上望。曠然今古懷。山形東負岱。河勢下通淮。白鳥孤雲並。荒煙萬木排。吾觀茲有得。興欲拍洪涯。

山口

古渡倚雙棹。蕭蕭秋色殘。山川南去遠。風雨北來寒。極望銷魂易。清吟得句難。依稀故園夢。千里下雲端。

送曾繹松滋令

粹行完圭璞。譚經得聖真。青袍尙腰折。素蘊喜民親。友益予孤陋。官閒子隱淪。風騷應賦古。亭下蜀江春。

次韻耒陽鄒明府庸

初作南冠至。隨聞墨綬來。猶憐百里遠。時見兩鳬回。江日披梅雪。春陽動琯灰。論文須太白。還憶一樽開。

泊漢口

大別山前晚。維舟望古津。孤烟漢川樹。長笛武昌人。珠曲今何地。蘭洲欲暮春。文王嘗美化。無復見遺民。

舟次胡陵中秋不見月

舟泊古城下。重雲埋桂宮。舊期今夕負。清賞一年空。遠浦依微笛。陰崖斷續蟲。蓬牕強樽酒。聊更約秋風。

秋泊

寂寞將軍港。船頭撞岸蘆。寒濤能灌口。幽鳥勸提壺。水漲江魚絕。秋深野菜無。如何晉張翰。歸思爲莼鱸。

梁澤雨中

點細波鱗淺。聲繁客袂涼。山煙藏晚翠。水荇濯秋香。帆槳無聊國。蓑綸自在鄉。風騷已多感。更欲上瀟湘。

次韻楊郎中洙早春

病客疏慵甚。江城節物新。東風驚柳思。暖雪鬪梅春。老信來雙鬢。閒愁著一身。賤貧非士恥。漉酒有陶巾。

次韻呂書記堤上見梅花

多病逢多事。窮年負物華。探春輸野客。騎馬看新花。南國稀江信。東風恨笛家。瓊枝心願見。行亦下堤沙。

潭州湘陰縣萬氏積慶堂（原注）堂在壘旁以歲時祀享

慶自前人積。堂因孝子成。惟時傳有後。于此事如生。喬木風煙老。佳城氣象明。謝庭蘭玉盛。知不負家聲。

送永州黃判官并寄丁郎中

零陵古佳郡。山水楚南奇。太守逢康樂。佳賓得杲之。翩翩漸高陸。逐逐就新羈。別子東歸去。長沙風雨時。

唐誦甥二首

唐生四方志。投筆慕前人。此日免魚腹。異時觀虎臣。茅柴酒亦美。玉縷鱸應珍。莫恨衣都典。歸來是早春。因滯江州久。謂爲千里遐。欣曾逢漂母。幾欲賣朱家。癡坐瞻雙櫓。東行負九華。歸須談旅瑣。勿作勝遊誇。

次韻聖和秋夜對月

綠桂西風老。金波玉氣明。清霜酣夜色。羣籟息秋聲。毛骨無遺照。關河共遠情。十年吟塞曲。畫角厭悲鳴。

病起酬聖和

安佚失于恃。病邪乘所虛。遂嬰漳浦臥。便憶茂陵居。幸爾筋骸立。頽然鬢髮疏。煩君山柏句。慰此不材樗。

留符離待鄉信未至

先隴封楸後。驛臣賜玦時。放舟初草草。去國合遲遲。珠滑新粳粒。金酣早蟹脂。南遷真不負。屈子獨何知。

豐齊道中

路遠程難計。人慵馬自遲。草蛛橫布網。桑螵亂垂絲。村落黃梁飯。牆籬紫菊枝。時豐物皆好。客思在青旗。

送王子正寺祥斷

君仕本儒雅。故宜京國游。官趨廷尉府。心異法家流。白草侵寒驛。清霜拂曉裘。行行句應好。雲日望神州。

小駟送錢中道

老馬久勞力。主人真寡情。知非換妾去。頗作戀軒鳴。楚豆不爲薄。江芻無限生。誠能懷舊德。時借爾山行。

次韻王仲達龍圖

常慕詩之學。今逢將者才。諷吟眞嘷炙。畏默若銜枚。天地秋風老。江湖醉夢回。韶英方合奏。難使擊轅陪。
早行寄田七

靈馬三更夢。江湖萬里心。辨途聽犬吠。占曉望橫參。浩露濡衰鬢。微風動醉襟。輸君正酣寢。鼾鼻沸雷音。
〔原注〕君善鼾。

簡定國〔原注〕時以目疾在告。

原子貧非病。張生心不盲。興隨緣自足。嬾與拙相成。竹葉疑無分。金徽尙有聲。幽懷誰晤語。空此望東城。
送席汝明

得子固已晚。嗟子材滯頑。義合乃朋友。不在疏密間。江闊東風冷。梅披臘雪慳。扁舟共春色。相約到淮山。
送計希顏

翩翩遠游子。驅馬亂山岑。丹穴飛鳴處。高堂日夜心。春風巴峽曉。晝霧楚城陰。家世文章事。仙臺紫桂林。
題貴池亭次蹈韻二首

一夜山南雪。清寒江上州。年華隨水去。客興爲魚留。聞雁思湖表。看梅寄隴頭。檣烏風信好。紞鼓洞庭舟。
魚味年年美。何須問舊池。江山清不改。陵谷變難知。節物驚冬至。蕭條使客悲。謫仙游賞地。空有白猿詩。

丙子元日三首

瑞歷開三朔。祥風驗八方。年華恨催老。節物喜隨鄉。鬱壘須時設。屠蘇獨後嘗。佳辰誰與醉。夢繞故溪傍。

爆竹驚山鬼。雕幃戴楚冠。祝延千歲酒。練氣五辛盤。江冷東風外。天回北斗端。羌城霖雨甚。從此看春寒。遙想千冠佩。朝元太極天。鳴鞘開殿戶。索扇起鑪煙。慶事通祥表。和聲入樂懸。江湖祝堯意。仁壽萬斯年。

和吳端甫書懷

舊學驚心在。窮居惜鬢華。詩書憑淨几。水竹抱鄰家。霜雪巴西夢。風波楚北嗟。知君厭留滯。我亦正塵沙。

二月二日

江鄉春值閏。二月似深冬。雪濕妨挑菜。雷寒未起龍。雞蟲閒得失。蠻觸小交攻。稍覺雲天霽。西山上翠峯。

送僧懷善

獨鶴翩無累。孤雲晚倦飛。羣山帶江處。一錫背塵歸。妙學窮神祕。高懷熟世機。漳濱多病客。空此望巖扉。

過桑八墓

夫子能詩者。寒吟四十年。于今傳好句。無處訪遺編。古意哀東野。窮愁死玉川。惟餘北山冢。松柏鎖秋煙。

寄長吉孫二首

別爾忽經歲。言歸欣好音。神清率更瘦。學苦鄭玄心。竹徑依山遠。沙溪過雨深。世科思汝父。卽已御祥琴。賞罷盧溪菊。來尋楚澤春。蘭舟逾百日。椒酒值佳辰。勉爾青箱學。寬吾白髮人。小園遊息地。松竹更相親。

次長庚孫自汝寄詩韻

近就陶家舍。扶疏草木周。頗移蘭就水。已計竹爲樓。飲食隨宜足。光陰任自流。爾曹來伴老。日問下江舟。

輓慈聖光獻皇后二首

四紀坤儀正。三宮冊號尊。蚤還明辟子。坐見太平孫。治詒遺神几。厥衣出寢門。如何天下養。難駐白雲軒。聖孝心崇報。宮庭詔屢頒。喪期逾易月。陵兆改因山。已想天人樂。猶歸藥使還。蟠桃舊亭上。時節壽觴間。

輓漢安懿王任夫人二首

自昔商任貴。于今慶裔光。來嬪周季歷。有子漢宣皇。桺玉輝幽竈。車雲擁畫裳。哀榮無所憾。新廟五陵旁。鹵簿三川晚。佳城一品尊。翟衣新綬命。神寢舊王園。淒斷風鈴遠。青蒼霧蓋昏。從今知聖作。大義稱私恩。

輓大行太皇太后三首

四裔柔懷外。羣生惠澤中。簾闈九年政。覆載一心公。馬鄧徒聞儉。姜任詎有功。風雲黃道靜。杲日上天東。典禮辭先后。恩私杜外門。虛心延衆正。損上益羣元。仙路三川近。徽音四謚尊。賓天去何恨。聖孝託神孫。夕月沈金殿。秋風冷玉衣。臨當復明辟。忽自厭繁機。藥使來何暮。嵩呼數已非。孤臣恩未報。泣望國西畿。

輓中書侍郎懿獻傅公二首

里閭推前輩。臣鄰接近班。深心語默外。大節險夷間。付託龜趺字。哀榮馬鬣山。遙知濟源第。風月草堂閒。公昨初移疾。予方丐一麾。尋聞升屋告。適是出關時。零落孤龍友。〔原注〕公與予及故孫莘老最善。約爲三友。綢繆記鳳池。白頭懷抱事。西望不勝悲。

輓右光祿大夫知樞密院事贈開府儀同三司孫公二首

岑令神情竭。裴公柱石衰。國貪黃髮舊。身負赤松期。人也將安仰。天平不慙遺。延和聽詔語。深見兩宮悲。樞極元豐議。人猶記話言。載來籌廟幄。遂見偃戎軒。一品哀儀重。三司錫命尊。綢繆承晚契。揮涕望西原。

輓司空文定張公二首

德業文章事公平。取數多。雖驚壤梁夢。會有望門歌。人贖心徒爾。舟移古奈何。青編如可託。後世看巍峨。澹泊環中妙。超遙物外仙。百年從委蛻。一匱戢彌天。晚契承知己。遺風在象賢。東橋松柏路。不得望新阡。

輓司空贈太師申國呂公四首

元祐飛龍日。淮南卓馬歸。周人瞻赤鳥。鄭國賦緇衣。曠度銷羣異。清言析萬微。方依泰山重。俛仰失巍巍。衡鏡公多士。著龜信兩宮。羣生遂耕織。四海戢戈弓。奪去天何速。藏深壑已空。潭潭新府第。東閣閉春風。玉輦躬臨奠。金錢詔治喪。樾官周尙父。世爵漢扶陽。位席虛羣望。松阡竊舊藏。門中蘭玉盛。有以慰思皇。歲有懸車表。新聞曳杖嗟。風雲四朝仕。公相百年家。故國山川近。西郊鼓吹譁。旂常難盡記。膏澤徧幽遐。

哀魯國宜靖曾公三首

柱石三朝重。軒裳五紀榮。忠勳等張霍。善慶似韋平。光氣收辰象。儀型失老成。易名宜合靖。千古詔幽明。鼎鉉調元久。貂冠就第閒。朝廷方憲老。夢寐忽頽山。白日佳城敗。東園祕器頒。深宮那可見。桃李在人間。不慙天何理。云亡國所嗟。還應騎列宿。但說去流沙。清廟陪烝享。鴻樞見世家。悲風淒洧路。哀咽滿簫笳。

哀光祿王卿二首

天驥騰長坂。秋鴻御順風。俄從絳衣使。不待黑頭公。志蘊留家集。光華掩竊宮。惟餘善人報。流慶在無窮。義直中能恕。才高氣不矜。衆人疑白璧。吾道信朱繩。勳業無天命。文章有子興。冥冥何可詰。萬古一邱陵。

哀太尉惠穆公三首

弈世承圭袞。三朝侍冕旒。臨邊晉羊祜。坐幄漢留侯。樂易門多士。幾深廟有謀。那知天不憖。俛仰一山邱。四塞宣皇武。殊庭遠世機。如何梁木夢。不待袞衣歸。門戶傳蘭玉。忠勳載鼎旂。空餘殿楹字。鸞鳳五雲飛。望履鴻樞府。熙寧始識公。容無高位氣。語有大臣風。感慨方山仰。驚悲已壑空。緇衣國人意。轉入薤歌中。

哀應真李先生三首

名教心爲樂。逍遙志自求。遂成君子隱。初異道家流。風月閒三楚。巾裳付一邱。空餘清泰院。雲薜舊巖秋。節行幽人正。林泉隱者居。忽歌東魯夢。未上茂陵書。世變還舟壑。門宏待駟車。衆哀無以致。爲託輓聲紆。生死心先達。康寧壽亦遐。今威成白鶴。老子去流沙。妙意傳琴祖。微言補易家。試觀餘慶後。簪紱已光華。

輓秦國夫人三首〔原注〕安厚卿母。

久被三宮眷。誰如五福純。脂田天府國。綵服斗樞人。枕夢華堂晚。仙期碧海春。尋常居養地。悄悄繡簾塵。賻槨來中禁。簫笳去國門。素冠空列鼎。白髮但歌盆。彤管音徽盛。甘泉像貌尊。所傳天下勸。豈獨慰兒孫。夫榮子方貴。全慶獨乖離。晝靜蘭羞歇。秋高薤曲悲。晴雲縈壽隴。霜日照銘旗。無復升堂拜。空餘執紼詞。

忠肅集卷十七

五言長律

縣齋歲晚寄萊蕪田同年〔原注〕鯁字直儒。

西北東南邑。相望歎索居。音塵路千里。契闊歲三除。薄宦隨羣衆。平生媿拙疏。茂陵將謝病。中散不便書。燕澤歸鴻盡。東山晚雪餘。江湖勞夢寐。風土污簪裾。塵卷吾成癖。囊詩子富儲。孤懷吟劍鏢。舊跡夢崑墟。今古看毫髮。功名賸贅疽。何時拂衣去。相與醉鱸魚。

洛宮

坤腹疏靈境。蓬宮抱故城。清風百年內。芳草幾番平。樹色埋危屋。湖光泛彩楹。真游三島近。仙界一壺清。外慮隨塵隔。虛懷敵水明。松筠烟翠老。臺榭綠苔生。敲枕巫雲近。披襟楚吹輕。舟橫疏柳靜。橋臥晚波晴。事往空歌嘯。人閒自醉醒。我來真漫興。魚鳥莫多情。

梁宣明二帝陵〔原注〕宣明二帝。蕭督蕭歸也。初湘東王繹平侯景之亂。卽位江陵。改元承聖。三年。

兄之子岳陽王督。引西魏兵攻繹。害之。尋臣于魏。而稱帝于江陵。傳子暕。暕傳子察。通三十年。爲隋所滅。

侯景淪江左。湘東復有梁。經綸鍾厄會。禍亂發諸王。忍死瞻姑熟。尋戈起岳陽。車書千里蹙。符數百洲亡。二主非神武。開基挾北強。中興乖晉睿。愍德肖吳光。歷閏天餘氣。哇鳴井底鄉。快心真噬腊。覆手已牽羊。臣妾隨三紀。圭裘隘一方。故都終契闊。宗祀各悲涼。雙冢留衰楚。遺孫盛有唐。神靈依古剎。雲木抱回岡。野火穹碑斷。秋風蔓草黃。樵童雍門歎。總帳魏臺荒。天地雙車轂。興亡一酒觴。冥然無足弔。幽思漫徜徉。

送李祕監代還

天聖旁求盛。明公射策賢。三朝推國器。一節到華顛。卯翼千餘士。冰霜四十年。至誠忘畛域。端已笑章絃。政愛偏東土。民謳載兩川。旄飄外臺節。貫朽大農錢。松柏風霜後。蒼龜禍福前。求開建封幕。又泛馬融船。士望儒林丈。官儀祕府仙。仁能化鴟泮。明不浚魚淵。蔽芾人人頌。京坻歲歲田。吟春西渚殿。醉月北樓天。卓馬周侯覲。三公漢守遷。蜀江飛大旆。魏闕望非煙。賤子何爲者。名途祇偶然。世高劉表幕。才媿杲之蓮。願借今難及。遺恩久自傳。鄰哉拱堯舜。天下俟陶甄。

秋雨用唐誦韻

大雨餘炎洗。清秋爽氣回。人情醒委頓。物象救低徊。臆岫滋乾翠。田禾起早栽。雲空明復晦。風縷密還開。草合門三徑。蛩緣壁四隈。藥奩烘潤醖。書几拂陰塵。養底漁情樂。沙邊客意催。簾幃晨氣濕。蕉竹夜聲來。想見天開月。行期菊滿杯。端居聊可喜。不用拂莓苔。

六月六日避暑山寺次蹈韻

楚國元卑濕。炎天更鬱蒸。風吟同倦虎。霄望劇愁鷹。渴肺塵將岔。流膚汗不勝。嚙肌紛暗蟻。繞鬢鬧飛蠅。六月常難雨。三湘不識冰。爐烘一天地。火藥萬川陵。氣候金初伏。襟懷水未澄。高明尋偶得。林麓遠同登。此地聊幽遁。危亭更上層。泉聲懸峭嶂。松影轉舳舳。汲井沈圓李。緣池摘翠菱。涼清生洞壑。秀綠動溝塍。佳氣西頻望。鄉欄北屢憑。有期羣野鹿。無法問山僧。雲石逢如舊。巾裾見若憎。聊堪優卒歲。不愧俯捫膺。

和路秋懷三十韻

天地炎氛退。江湖顯氣涼。西風來沆瑒。久客興徜徉。夜匝烏南樹。心驚雁北方。乍因鱸感慨。肯爲鵬憂傷。縱步青筇杖。投詩古錦囊。精煢籬下蓓。狼籍沼中香。妙理晞莊達。衰歌笑楚狂。是非來袞袞。光景去堂堂。別浦丹楓老。閒園碧草芳。林顛蟬嘒急。霄路鵲飛長。曉露清饒月。晴雲暖護霜。琴中知水意。樓上得山光。桂長金波外。槎沿玉漢傍。江天晚搖落。澤國少凶荒。竭作趨川壘。歡言治圃場。神祠鼓遞響。社壺酒初嘗。自昔悲時節。閒愁滿肺腸。宋生辭辨屈。甯子意歌商。代謝惟寒暑。平均彼昊蒼。放情羣鹿豕。度德負簪裳。致主深慙尹。汪波又愧黃。無功可銘鼎。有學不鍼肱。賦興須潘子。詩懷勗謝郎。雖欣去酷吏。更憶舞商羊。不解葵傾日。寧忘鶴返鄉。錦封西澤鯉。珠剖北山梁。塞馬難前慮。江鷗肯下翔。無爲澤邊悴。更賣橐中裝。朝野多閒暇。洪纖遂樂康。何時放歸櫓。大編水中央。

次韻跂蹈登護法院澄心亭

昔泊銅陵縣。重來跡可尋。洞巖一指顧。花谷記登臨。歲月回秋棹。江湖入醉襟。魚籃腥邑市。俚語雜山禽。

紫筍抽薑圃。朱丸綴柿林。長官誇樂歲。游子足悲吟。眺望春思曩。疏慵老嘆今。蓬牕把書臥。空此望澄心。

題和州雲蔭軒

古木無年歲。新亭托隱棲。交涂寒蠹整。垂蔭亂雲低。明暗蒼烟合。深沈綠幄齊。雨回陰徑外。日隔畫簷西。涼露緣虛滴。珍禽占密啼。仙家青桂洞。隱士碧蘿谿。覆冒均松蓋。妖穠笑李蹊。坐疑秋色早。境與世塵睽。地惜開軒晚。名因寓意題。還當推大蔭。天下一民黎。

城北庭

邊草連沙白。燕雲擁漢青。將軍眠塞壘。使者拜王庭。金帛三千乘。和親七十齡。豺狼甘血肉。騏驥老林坰。秋色榆將落。書生涕但零。邊塵何日靖。願一震皇靈。

次韻輅氏東亭書事四首

寄隱無懷土。爲文倦解嘲。地閒從草徧。門靜絕人敲。螳伏尋蟬捕。鶯斜趁蝶捎。楚冠誰問事。越鳥自知巢。罇酒欣常滿。鄰書得借鈔。援琴意流水。彈劍恨空庖。蘭徑深添菊。蔬畦淨拔茅。殷勤謝老圃。善惡不相殺。幽懷樂所遇。且任北山嘲。世事基枰變。年光石火敲。松筠陰自冷。蘿葛蔓相捎。草密蛇橫徑。簷低燕露巢。楚醪無再設。靳紙不重鈔。旋買杭留客。親科筍付庖。靈山瞻二祖。歸路近三茅。塞上藏憂喜。人心浪自殺。朝夕此疏傲。東亭無我嘲。並城田鼓作。鄰寺食魚敲。樹密日先暝。竹長雲可捎。遠書惟雁足。小隱是鳩巢。茶憶新團碾。琴緇舊譜鈔。懟時常笑屈。投閒實慙庖。霜雪期松柏。風雲富草茅。周郎晚菰近。有以代嘉穀。

自有逃虛樂。徒興尙白嘲。晚槐嘶意急。蠹木啄聲敲。犬傍青籬臥。童尋赤棗捎。微茫枕間夢。安穩睫邊巢。困憶石泉弄。渴思冰蜜鈔。襲香蘭入佩。益氣芑充庖。疏洗王家竹。誅鉏宋宅茅。東亭真可樂。萬事付紛綽。寄長蘆福禪師。

七言律詩
境與人相得。長鯨宅海宮。香花六時會。心跡萬緣空。地恐諸天接。江從九澤通。潮噴寺門冷。霞拂殿簷紅。暮雁來淮北。朝帆下浙東。千重蒼桂霧。萬頃碧蘆風。祔擁山雲暖。餅函水月融。當年約蓮社。何日謝塵籠。

離冀州馬上示趙湜

馬蹄輕滑背城闌。廣陌朝暉健醉魂。暑氣泛清憐小雨。木陰環翠羨名園。宦遊淹薄風埃熟。時事侵凌耳目昏。獨有空愁慵病客。肯來吟嘯伴南轅。

紀南道中望荆渚

地經三國鬪龍蛇。江勢天形控蜀巴。藏雨鳥歸荒冢樹。採金人聚淺壕沙。子囊城廢今秋草。高氏宮遺昔井蛙。倦客詩情真劫劫。得于鞍馬似曹家。

雙橋

危橋相向翼高堂。步步行空跨石杠。漢外夜驚靈鵲度。雨中秋臥綵虹雙。烟開從此瞻瀛島。路遠何時過

楚江記得扁舟綠楊岸。畫欄朱柱對蓬牕。

將至監利先寄王令

屈指中秋六曉昏。大堤叢竹見霜筠。〔原注〕夏中奉有堤竹成叢之句。未乾醉月題牋墨。隨蹕還家走馬塵。撫景敢嗟經歷倦。軒眉頻喜笑言親。明年各是東歸客。羊酪蓴羹萬里人。

監利泛化邱湖遂至北洲寺

淼淼平湖闊楚江。方舟兩槳破秋光。瞿風釣月嘉魚國。飛雨翹煙白鷺鄉。故老昔能悲岸谷。騷人今但愛滄浪。北州更有忘歸處。寺壓蘋花千里香。

馬上和王監利見寄兼簡鄒澤民

憶昨西歸春未窮。重來堤竹已成叢。川塍足水稻齊插。霖雨漲江河欲通。一馬久期均物理。雙鳬安得快仙風。故人況有瀟湘約。應喜樽前笑語同。〔原注〕二君江南故人。而澤民亦見約會于邑中。

高唐孟延年明府見招

公幹方吟簿領迷。浩然詩句慰相思。壯懷已有潘毛歎。陳迹猶懷漢佩奇。塞下書音稀雁足。江南秋味憶蓴絲。祝君多種官田秫。欲趁淵明釀酒期。〔原注〕來詩有蓴絲之句。乃道昔年金明勝遊。

招鄒澤民

日借西園放客愁。忘機魚鳥分相投。水深碧沼前時雨。風滿高臺六月秋。蟬嘒已驚移節物。鷗羣何事亦

沈浮煩君試拔塵埃足。來伴元生漫浪遊。

次韻鄒澤民感事

河蝗蟻虱玩天恩。餉饋驅馳不足論。陛下至神收廟算。諸公何術偃戎軒。凱歌計日登宗祀。歸將驚秋望故園。賤士江湖真碌碌。狂吟無以謝乾坤。

清明日至潛江馬上先寄王炳之陳子正

桃花飄泊萬紅英。獨佩詩囊傍水行。二月東風撩霰雪。峭寒天氣作清明。病懷敢有賢勞嘆。壯志徒因節物驚。罇酒喜親陶靖節。經帷仍近董先生。〔原注〕子正說春秋。

五月十日發俞潭先寄王潛江

雨過長風吹野塘。水深川路白泱泱。人如澤畔窮吟客。天似江南八月涼。陂下臥輪車乍歇。田間鳴鼓稻齊秧。長官應爲斯民喜。準備新詩賦萬箱。

戲呈詩會諸友

鄧樓吟侶近蕭疏。椽筆食抄未見書。〔原注〕澤民近多傳書。拙客懶同嵇叔夜。〔原注〕自謂也。少年文愛馬相如。〔原注〕彥修直夫頗聞會賦。夜涼燈火心親古。秋老江湖興起予。欲整羸師尋戰地。清風無使舊壇虛。

月夜卽席次韻

天帳空虛碧玉寒。露華應滿漢宮盤。十分月上星光掩。四坐詩成醉語闌。楚渚雁歸驚客恨。庾樓風靜足清懽。一年惟有中秋賞。銀闕鼇山夜未殘。

次韻直夫喜與炳之會

莫悲人事轉秋蓬。但使樽中酒不空。尺蠖屈伸今我倦。南鵬飛化昔君同。〔原注〕炳之。余同年。天晞殘雨偏宜晚。堂壓寒溪賸占風。合繼回源書讌籍。楚山堅石盡堪礱。

次韻炳之河亭

風拂藍溪舞翠綃。庾郎池榭旋誅茅。春蘋初見香生葉。夏果重來子滿梢。淥酒不空期散雪。清談爲樂敵絃匏。塵埃久負江湖志。徙倚朱欄祇自嘲。

寄鄒澤民祕校

去年樽酒共論文。一別西園跡已陳。終日城頭憶王粲。清吟澤畔似靈均。懶書已負交朋責。滿秩初湔耳目塵。萬里江風秋思近。歸心聊復借鱸蓴。

送楊祕校

大櫓雙櫓換巴船。美滿西風水接天。蘇子意飛黃鵠外。梁公心在白雲邊。蟹肥采石秋霜足。酒滑湓江夜月圓。綵服拜親無限樂。幾多幽思入新篇。

別田延年王潛江

才非王粲入荊州。淹薄三年已倦游。疏世自甘時不與。論交猶得子相求。學知所樂輕文繡。言至無瑕絕
悔尤。大舜簫韶方九奏。佇看靈鳳出丹邱。

次李秬新秋韻二首

雨晴涼意日相親。物物秋容絕點塵。滄海誰期泛槎客。西風先傍憶鱸人。收還志業圍棋局。分付光陰漉
酒巾。欲約一罇清夜話。月中涼露滿松筠。
風驚梧葉覺秋還。萬丈歸心到北山。已許生平江海上。坐求功業簿書間。頗聞都護刊銅柱。更喜將軍入
玉關。朝野清明無一事。相從那使酒罇閒。

次韻李中舍秬秋雨

三伏方中火欲流。陰霖匝月氣爭秋。坐愁屋底須持蓋。聞說田間可漾舟。狂草滿庭泛戢戢。濕蟲侵戶聽
啾啾。獨于水部添詩思。坐滴空塔興未休。

次韻酬李秬

公幹長迷簿領書。渥言那似阮元瑜。闇投子有夜光璧。欲報吾無明月珠。急景壯懷悲劍鏢。西風高興夢
蓬壺。勉強豈使今慙古。元白鄒枚亦此都。

出都二首

兩槩東飛下大梁。樽壘漂泊過重陽。江湖常恨連年隔。驛旅寧爲萬里傷。淮寺月寒蘆颺白。楚林霜早菊

迎黃篋中諫紙餘多少。盡寫新詩入錦囊。
重入修門甫歲餘。又攜琴劍反江湖。乾坤浩浩何由報。犬馬區區正自愚。緣熟且爲蓮社客。伴來喜對草堂圖。西箱屋了吾真足。高枕看雲一事無。

初發梁澤

蒲側荷翻小雨收。鱸膾高興滿扁舟。雲稀樹色偏宜晚。天借湖光賸占秋。孤鶩落霞閒上下。紅蓮白鷺各風流。此行誰與同樽酒。南國江山盡舊遊。

金陵

月滿扁舟久客懷。石頭城下暮潮迴。霸王基業從吳始。人物風流自晉來。大抵險深輸道德。于今榛莽蔽樓臺。吟毫千百年間事。賸寫江南庾信哀。

南喜寺

天監禪僧此結廬。石頭高士有遺居。樓飛縹緲巖腰峻。庵靜崢嶸閣道虛。雪後佳花香澗谷。春寒松霧滴巾裾。山中物色吟雖苦。盡是時翁掇拾餘。

靈巖寺

先望雲端金碧明。久穿葱蒨踏崢嶸。山疑圖畫曾經見。地喜生平所未行。隨處石泉春渴解。上方雲屋夜寒生。主人著意開佳境。無負千年四絕名。

連年往返水陸萬餘里。今自鄉中挈家南來。已至江州。行徼險阻。喜而作詩寄之。

亥宮驛馬歲翩翩。又作離鄉路數千。拔宅今爲大去國。出災休算小行年。訪尋前日停舟地。僅迫窮陰舞雪天。屈指還家已無事。便應調拂武城絃。

舟次再寄

小孤風順水安流。溢浦欣聞已繫舟。幾日庭中折奇樹。從今江上解離憂。客心歲晚驚催櫓。雪意天寒入倚樓。東園梅開酒更美。團圓無復越鄉愁。

岸次見梅花不果折

武昌江口見江梅。紫萼瑤芳取次開。窮臘雪寒新霽後。滿枝春色爲誰來。坐嗟隴首無人寄。莫使城樓有角哀。猶喜東風慰岑寂。暗香時許度蒿萊。

自衡嶽至福嚴寺二首

曉指禪關入翠屏。烟嵐金碧旋疏明。旁看陰壑溟濛失。斗上雲梯僂僂行。漫興獨于元子愜。詩懷容與謝公評。區區出處勞分別。朝市山林各有情。俯仰巖谿萬仞臨。恨輸飛鳥極高深。青雲平地人難到。流水殘花路可尋。稍覺衣裾侵小雨。漸聞鐘磬下遙岑。丈人不厭頻來往。欲作香山得二林。

福嚴寺呈貫之少卿并諸禪老

眼熟林樾認舊緣。耆闍峯北入非煙。雲房直上三千尺。蠟屐重來十五年。山奧坐能朝萬象。地靈深自接諸天。暫游久住均如夢。社客何須約白蓮。

至福嚴寺得鄒耒陽書因寄

盡室攀蘿入五峯。峯前金碧寺飛空。山當星鳥離方鎮。地闢天龍海上宮。喜我徜徉泉石外。憶君辛苦簿書中。登臨樽酒無因共。半夜題詩寄北風。

欲登祝融峰阻雨呈少卿

霧雨陰冥萬壑蒸。五峰當面失雲層。愁如藥使迷蓬島。路似仙溪隔武陵。已認神靈憎俗客。欲將魔障問巖僧。勞公爲我所昭聖。暫借扶桑白日升。

贈南嶽黃少卿二首〔原注〕師道貫之管南嶽廟再任。

身在南山非隱淪。閒中官貴異風塵。清泉白石預何事。華髮綵衣今幾人。虛室圖書忘歲月。壽筵香火祝君親。朝廷不以忠移孝。又說恩函拜命新。世人行止兩忽忽。公獨榮親祿隱中。清職正同香案吏。曠懷都似漆園翁。南陵蘭茂晨羞潔。內鼎丹靈老頰紅。雖喜論心慰遷客。區區安足識冥鴻。

贈黃少卿二首

仙翁來自太常班。再乞林泉捧詔還。養志祇爲華髮戲。無心宜共白雲閒。一樽未厭塵中客。雙屐同躋雨

後山爲寄東宮舍人語。五峯新句兩難攀。
攜筇得得訪雲關。恰值東湖賀監還。泉石主人元好事。塵埃游子暫偷閒。心輕齊組知靈運。文滿浯溪服
次山。祇恐東風喚歸棹。江頭楊柳已堪攀。

少卿送醉肴至山中

十里傳書厚意將。珍肴醇酎寄山房。定知僧舍厭疏食。更欲雲巖有酒鄉。一飯常聞淮上報。獨醒徒使楚
人傷。攜持明日到峯頂。試揖浮邱共此觴。

次韻貫之見勉冒雨至後洞

狂電驚雷曉未收。春雲能護洞天游。徘徊已盡剡溪興。祕怪難探禹穴幽。強勉更須勞屐齒。龍鍾何憚過
山頭。從今功德應圓滿。厚意成人豈易酬。

又次韻

已踏雲梯上翠岑。洞中聞說更幽深。夜驚寒雨生瀟灑。愁起孤猿助嘯吟。白日昔傳仙可學。青天今笑夢
難尋。故應清興無時盡。肯爲淹留折此心。

登祝融峯題上封寺二首

磴險梯危路忽窮。勝遊須到祝融峰。九千丈外雲間寺。一萬年餘石上松。引手莫高疑觸斗。臨池毋久恐
興龍。此山惜與中都遠。未得君王檢玉封。

寒風吹腦赤霄邊。飛鳥猶難到絕巔。下見人間又成海。恍驚身世此何天。巖腰半白春留雪。僧面多黔日冒煙。我亦淮南宗姓後。舉家應合到神仙。

貫之自嶽先還衡陽示詩見別次韻奉和

雲壑登臨杖屨隨。狂歌清醉樂忘疲。拍肩正賦遊仙曲。回首還吟陟屺詩。春草便驚南浦別。壽觴應慰北堂慈。區區流水高山意。常有孤音託子期。

忠肅集卷十八

七言律詩

春日

小雪崢嶸變曉寒。舊年殘臘破新年。明生月魄初三夜。氣動春灰五九天。蓼甲韭黃隨綠酒。綵幡羅勝上華顛。故園欲告西疇事。思我楓林楚木邊。

游白雲山二首

籃輦微風迎曉涼。細碎草木無數香。千巖雲歸雨未足。幾衝水淺禾難秧。〔原注〕山中之田。每一水所溉。謂之一衝。如曰一溜也。松下陰森石橋冷。竹邊曲折溪路長。西家又得避暑地。翠微亭在山中央。

行窮葱蒨坐清涼。隱几川原一炷香。小雨輕從前嶺去。高禾移就下田秧。禽聲不見山悄悄。江影新生客思長。政使歸期猶遠在。白雲遊樂未渠央。〔原注〕二月七日與客游白雲山。二子侍行。路有詩。次韻一首。

次韻跋蹈山行

舟伏盤渦傍淺沙。北風寒日氣清嘉。初從磯口詢漁舍。漸入雲林問酒家。萬里欲飛愁若絮。小爐危坐眼生花。筋骸養作衡山力。坐擁肩輿聽譟譁。

二子訪酒家不遇次其韻作

青旂不見山雲深。何以慰此二子心。阮修杖頭故應在。黃公舊壚無處尋。求有不得事當戒。興盡必返愁難任。仙家竹葉未必美。舟尾茅柴還可斟。

賞心亭

佳山逶迤抱故國。危觀突兀凌長波。仰憑飛景赤霄近。下瞰萬木蒼烟多。三閣繁華芳草在。七朝風物一禽過。後人未見興亡本。祇笑陳家玉樹歌。

涵輝閣

碧波瀾漫起春湖。草色黃深岸四隅。新謝小桃雙燕至。從南微雨好風俱。暫來祇是林泉客。長見須憑水墨圖。無數鳬鷗記相識。近人浮泛滿青蒲。

王母池

阿母宮前阿母池。池光清滑瀉玻璃。岸擎黼座涵佳氣。影上仙衣潤彩霓。靈液發源來海谷。飛花隨泛出桃谿。羽車鳳蓋無消息。寒月沈沈寶殿西。

次韻王太傅關太丞同遊石鼓山

禮局仙人兩俊流。高才相敵異商周。北溟風水初登化。南楚江山晚並遊。契闊歲華歸大笑。留連騷雅入冥搜。江邊一醉驚離散。應有功名約白頭。

次韻陳秀才胃遊石鼓山書院

山頭雲木鬱蒼蒼。山下江流淨鑑光。亭閣瞰臨慙舊句。巖溪開築想前良。心甘水石忘羈宦。耳冷絃歌歎
士鄉。寂寞先生與叢竹。相看孤節幾秋霜。

元日寄耒陽

元日江湖萬里身。四方南北等埃塵。莫悲天地如行客。還喜瀟湘見故人。淥酒桂盤催獻歲。小花羅勝寫
宜春。淵明祇向東風醉。應笑窮吟浪苦辛。

次韻耒陽鄒明府庸

夢比光陰一鳥過。四年西渚負長哦。逢君舊眼青猶在。驚我寒鬚白已多。言偃政聲方浹洽。茂陵歸思獨
蹉跎。何時又見揮吟筆。快若輕丸下峻坡。〔原注〕君詩思敏捷。

承以舊韻示喜霽詩次和

楚雪飄殘四望間。江山晴氣撲衣冠。曉餘霜日明崑嶺。清極人家在廣寒。賸琢瓊瑤君句巧。相當旗鼓我
才難。青天寂寞浮雲盡。最愛春風幾鶴盤。

簡提刑朱仲隱初玉學士

當年蓬館近儲胥。紅壁東西對直廬。綿絕同參曲臺議。芸籤分校御前書。謁來憔悴騷人國。隨見光華使
者車。莊鳥有吟皆病思。賞音徒欲慰頑疏。〔原注〕君陶案近詩。

次韻朱仲隱寄鄭寺丞

猛脫塵勞厭競馳。歸來不著楚騷辭。江家有宅能依竹。陶令臨流祇賦詩。簷北嶽雲供顧望。水西州市隔喧卑。康強八十人難者。此外窮通各一時。

送呂雅寺丞

玉府文華異俗氓。丹山毛羽盡祥珍。伊臯相業光前史。王謝家風世有人。好學少年忘貴胄。攜詞奇藻敵陽春。如今四海皆桃李。曾見槎通萬里津。

路虞部得代還

東風楊柳認春天。轆轤車音向郢山。久客不知游宦樂。五年方喜取書還。邊兵近日屯湟水。漢將何時入玉關。自古西人多慷慨。功名無使壯圖閒。

次韻聖和還自京師途中見寄

郊原新雨靜纖埃。路下非煙白玉臺。遼鶴應悲里中舊。仙臈今自日邊迴。雲端心望高堂喜。馬上詩尋故社來。牢落不才疏世者。尙貪斗粟變蒿萊。

次韻李聖和寒食郊居二首

春郊寒食歎淹留。巧映鞦韆樹色柔。杏萼離披翻白雪。柳花輕薄聚圓毬。風光無賴撩歸思。節物相逢眷昔遊。塞下塵埃侵夢想。何時仙袂揖浮邱。

林梢黃綠野禽鳴。泱泱春陽泛地平。禁火人家甘冷淡。浴蠶天氣趁清明。誰將馬絡尋春去。獨佩詩囊傍水行。稚女弄花田叟醉。笑歌真是太平聲。

次韻李冲聖和秋懷

燕雁南來久客驚。寥寥風色試寒輕。吟殘紅葉詩無味。歸識滄洲夢有情。歲晚壯懷同劍冷。樓高愁思共雲生。淵明無酒重陽近。幾日東籬繞竹行。

聖和受代

枉尺誠非聖賢事。守道固與時俗違。難哉仕者行己志。況復儒生疏世機。喜聞傳告令尹政。應歸瀚拂塵土衣。快君高舉歎留滯。把酒爲歌黃鵠飛。

次韻王太傅同陳長史訪僧不遇陳君先歸

林宇幽深止秀奇。中間寧有大顛師。漫勞雪客乘舟去。卻是雲僧採藥時。歸興忽同分嶺水。餘懷誰共一枰棋。故應重作春游約。已覺東風傍柳枝。

謁金鑾瑩禪師

西城十里入溪林。頓覺塵埃脫醉襟。淺渚敗荷縈白曉。淡雲疏木抱清陰。陶潛但有思歸賦。韓愈殊無喜吏心。遺照主人應念我。試將秋思寫瑤琴。〔原注〕遺照堂名。

次韻王太傅答周郎中寄酒

子雲寂寞歲將回。門靜因逢載酒開。白雪雅歌郵置去。紅泥仙槥印封來。塵闌卽日先稱壽。賓席何人伴倒罍。莫作獨醒孤遠意。杜郎親撥凍醪醅。

再酬王太傅

曲臺仙客苦能詩。思入風雲學有師。楚國大夫吟澤日。江州司馬愛山時。年華悄悄還杯酒。塵事紛紛付奕棋。想得懷歸心似我。越禽常自記南枝。

次韻王弱翁借書錢君

錢家書囊盛儒林。禹穴時容探萬尋。嗜好自同皇甫癖。寫傳應慰獻王心。此于取與無傷義。盍以幽奇付賞音。猶說冬官未通借。覽之安得有千金。

次韻弱翁早春病起

換骨欣逢九轉丹。東風迎歲雪梅殘。玉良試火增虹氣。鶴老經春怯露寒。詩就越聲驚惻惻。夢回天樂記珊珊。故應有德神明相。寧事祈禳叩夜壇。

次韻弱翁春中久雨

楚雨廉纖無盡時。園亭惟有草菲菲。桃花泛水飄紅去。燕子貪泥帶濕飛。潤徹玉琴春氣弱。聲侵羅幕夜寒微。東陽病骨疏慵甚。留取清樽待霽暉。

次韻王弱翁題承天寺萃景亭二首

左右青林抱邃深。徑隨蒼蘚上煙岑。陵遷漸失三湘事。春遠閒傷萬里心。我愛白雲親鳥道。誰臨滄海較蹄涔。北欄曾指鴻歸處。杳邈鄉山不可尋。

四臨千里一危軒。灑脫塵中兩耳喧。隱几風波隨客棹。對江金碧露僧門。數峯煙老靈妃國。三月花殘杜宇村。不得相從嗟筦庫。新詩猶喜慰冥昏。

次韻孫景修題萃景亭

公遊何似拙翁巖。（原注）公守桂陽。開鹿頭山。名其巖曰拙翁。盤磴先經釋子庵。視聽稍遺塵種種。高名聊換府潭潭。時驅萬象歸吟几。盡洗叢荒破暝嵐。更有風華入春望。名園都在面東南。

又次韻四首

于此登臨稱謝公。湘南奇觀欲吟窮。天沈暮鳥煙氛外。山抱春城霧雨中。陂岸放車看宛轉。寺簷飄鐸送玲瓏。老僧已許炎蒸日。爲借清風解簟筒。

縹緲飛亭倚半空。景來酬對不知窮。天開雲嶂輪環外。地蹙林邱尺寸中。時有桂花飄馥烈。恨無泉玉瀉玲瓏。楚人不識靈均意。江上年年費粽筒。

背倚叢岡面佛宮。登臨酸足喜途窮。白紅花意生洲曲。紫翠山姿落酒中。寒鷺見魚行歷刺。珍禽驚客語玲瓏。亭前雨足農知歲。免卜靈龜灼腐筒。

隱几憑虛萬景空。涪溪能使決山窮。于今川隴民歌處。曾是干戈霸業中。蘋末起風香細碎。水光浮日影

玲瓏。苟能適意茅簷足。何必鴛鴦碧瓦筒。

送衡州王仲和郎中代還

鏡鼓催船下洞庭。鸞灘冰澀滯雙旌。蟬噪霰雪暮寒重。早晚瀟湘春水生。君意喜先湖雁去。我懷方共夜烏驚。明年奏課趨雲陛。拜罷當如漢仲卿。

寄湖北運使孫景修朝議

曾伴監輿入翠微。杪齋終日醉春暉。親烹林筍班犀大。旋膾溪魴白玉肥。歲月幾經鴻北去。風雲應有夢南歸。猶令猿鶴無驚怨。聞說頻年見錦衣。〔原注〕公雖在北路。時以使事過湖。

秋日卽事

湘城風物向秋新。興入羹蓴與鱸鱗。葉舞霽紅楓映寺。蓓含霜紫菊迎人。瞻望河漢乘槎客。歌詠倉箱擊壤民。欲放幽懷到滄海。徘徊黃鵠更傷神。

偶吟

平昔名場氣吐虹。青袍霜鬢老湘東。舊交半在雲霄上。壯志都銷水石中。樓上買魚乘酒熟。舍邊秧稻指年豐。清風令德人胥化。合使鄉閭號鄭公。

被旨還闕訓答諸公韻三首

楚雪三經橘柚天。君恩新許出湘川。雖非殿席虛中夜。且勝臺郎謫九年。歲晚病懷孤劍外。江寒歸思亂

雲邊妻兒莫恨歸裝薄。賸得諸公錦繡篇。
湘南竊食漢鹽官。長記靈煙魏闕端。隙過白駒三歲月。萍漂滄海一孤寒。九重寬宥環初賜。萬里歸心斗欲干。常媿主恩深未報。慨然眞喜脫囚冠。
幾年南楚聽哀猿。自昔江湖憶帝閭。粉骨何裨天下事。賜環難報聖君恩。餘光久記仁人里。引重仍慙長者言。安得新官來棹速。更隨春色到鄉園。

喜跼蹈登科注官〔原注〕餘姚烏程。

祖門傳子又詒孫。善慶儒科燕後人。雁塔繼題三世字。桂林仍見兩枝春。稽山照邑天如畫。霽水浮州地絕塵。我亦浩然歸思起。明年雙棹趁吳尊。

倚舟崇福寺寄臨湘衡文叔祕丞

相逢相別立湖邊。幾見鱗疊換歲年。簿領初離仲宣幕。政聲猶屈武城弦。歸舟落晚惟荒寺。病枕驚秋聽早蟬。咫尺松風亭下路。可憐雲霧隔青天。〔原注〕縣舍有松風亭。

行虞城縣早起寄公秉

一夜風聲海沸騰。東衣寒屋赴晨興。雲吹慘澹天西月。馬踏玲瓏雪底冰。吏事不堪年老大。歸懷那復病侵陵。遙知宴息庵中夢。正在仙門第八層。

寄公秉李郎中

二月晴霜冷逼人。深紅桃萼爛繽紛。寒中悄悄春強半。湖上悠悠水十分。心厭留書期謝病。跡疏罇酒憶論文。東風留著芳華在。何日仙臈下白雲。

次韻王定國湖上

君來惟有岸蒲青。落寞羈懷獨此行。深塢自迷春草色。綠陰初變夏禽聲。龜毛兔角知何物。鵬海鷓鴣各有情。且共論文一樽酒。吳霜從向鬢間生。

和王定國

地遠城東得得來。正如湖畔共含杯。眼中故舊青常在。鬢上光陰綠不迴。歸去汴橋三鼓月。相思梁苑一枝梅。我閒時欲尋君醉。爲僅芎醪更滿壘。〔原注〕病日。君爲置芎酒。

次韻定國約過李氏園池

年來高興滿尊絲。寒薄春風駘蕩時。稍愛燕脂開杏萼。已驚香雪爛梅枝。老于樂事心猶壯。病得新詩和獨遲。何日華鑣向金谷。擬追仙翼到瑤池。

次韻答王定國

江州居士赴東城。旬月相忘不寄聲。閉戶邇來能避謗。求田何處欲歸耕。筆端浩蕩詞逾壯。胷次崔嵬氣未平。我有白羊新賜酒。澆愁聊可一杯傾。

次韻王定國懷南都上元

九陌無塵夜霽天。兩都風物故依然。車馳馬逐燈方闌。地靜人閒月自妍。佛館醉談懷舊歲。齋宮詩思鎖今年。傳聞公子微行處。門外驂騑立繡韉。〔原注〕去年上元。南都同李公秉三四輩游靜覺。遂飲上生院。今年致齋太常。聞定國游相國。

同孫推官迪李郎中鈞督役河上敘懷三首

時哉風物媚郊原。無賴禽聲對客喧。山色帶煙屏倚漢。春陽凝日浪浮坤。河功田利茲爲重。士賤民勞豈足論。仙老不妨持道氣。朝餐華景望朝暉。

平湖勝勢抱南城。花氣濃濃馥近坰。黃變柳條歸老綠。紅殘桃葉換尖青。春乘病後成多感。事向閒中見未形。日日攜茶喚賓友。吳泉烹盡惠山餅。〔原注〕來詩問南湖事。

車馬傳聞漸欲還。河邊陳迹棄春灣。睽離心恨三秋月。積累功成九仞山。從事獨賢公弗歎。散材無用我宜閒。放夫急趨蘭洲賞。寒食光陰俛仰間。

送許敏修使二浙二首

大夫才業帝都俞。清潔寒冰在玉壺。流馬阜財求八使。鑄龍班節重三吳。海門曉日迎飛鶴。笠澤秋風趁鱸。亦欲東遊聞米賤。行臺還可庇疏愚。

兼葭曾愧倚瑤瓊。京兆經年共左廳。屢喜足音臨病几。〔原注〕臥病日久。屢蒙訪問。獨何才力致虛囹。〔原注〕君治閒封有能名。比以獄空被賞。亦及不肖。閩山近部榮鄉繡。越客何人識使星。隨看鋒車下江。

海歸來人物重朝廷。

題泰定小雉亭

名花多自洛城傳。物色春工十指間。漸買姚黃并左紫。恨無伊水對嵩山。主人妥妥多材藝。俗客悠悠幾往還。惟有萬竿亭背竹。霜青偏解照衰顏。

八月十二日同楊誠之馬全玉王似之泛舟至舊州塔下作

秋水瀰漫山翠微。西風清好坐吹衣。濃雲將雨東西去。白鳥窺人上下飛。陵谷是非詢野老。滄浪懷抱負魚磯。遲留莫聽嚴城鼓。待得雙橈弄月歸。

次韻趙伯堅令鑠郎中憶南都牡丹兼寄子由

芳叢百朶爛紅雲。曾倚西軒醉兩春。夢雨一驚巫峽曲。佩香常記漢江濱。病懷日負杯中物。花意今看檐上塵。回首東風君自問。欄邊更有後來人。

城北

塞門秋色陣雲飛。雉堞烟青畫角悲。河坼波濤含趙魏。星分畢昴半華夷。太原獵獍當征日。瀚海單于欲戰時。六十萬兵閒飽死。誰憐山後八州兒。

喜王彥祖新居

今見黃州慶有餘。侍郎門戶已容車。風流地望烏衣巷。瀟灑仙人碧落居。三畝江家須種竹。一區揚子獨

藏書東平我久猶如客。何日菟裘近里閭。

北山道中

隨馬盧泉碧玉流。野林春鳥語鉤輈。桃飄殘萼紅堆水。麥換新苗綠滿疇。世味淺深聊爾爾。生涯消息強悠悠。不如收拾詩千首。要似張家萬戶侯。

題所居圓明庵

茅齋幽廬小圃東。葛巾藜杖稱高風。守方固恐形爲累。內照應知色卽空。出入有虛還有實。輝光無外亦無中。世人欲識圓明事。盍問名庵隱几翁。

還句龍緯化文詩卷

誰識斯文久寂寥。希聲杳杳思滔滔。氣無外物纖毫累。才有靈光萬丈高。誤借鼓鐘娛海鳥。自堪奴僕命離騷。啞鐘亦欲煩君手。能爲孤音解鬱陶。

贈汪汾同年

往歲仙遊白玉臺。拍肩曾喜得洪崖。高門已覺陰功在。古獄猶嗟寶氣埋。風竹夜聲清醉枕。雨峯秋色滴吟齋。丈夫未老無多嘆。會見勳名與願諧。

祕閣曝書畫次韻宋次道

帝所圖書歲一開。及時冠蓋滿蓬萊。發函鈿軸輝唐府。散帙芸香馥漢臺。地富祕真疑海藏。坐傾人物盡

仙才燭憐典校來空久。始得今年盛事陪。

病起次和何溫甫祕丞琬雪中見寄

士譽民謳楚粵間。相逢傾蓋問南冠。吟餘候館春風峭。病後湖天霰雪寒。應喜白雲瞻望近。（原注）君迎親至此。獨憐滄海去歸難。雅歌贈我琅玕意。欲報慙無兩玉盤。

聞東園諸學生雪飲寄之

大雪填虛翻海波。袁安門戶可張羅。寒驚春絮因風早。病覺空花向眼多。梁苑喜開陳桂酒。郢人誰已唱蘭歌。少年撫景應須醉。莫學衰翁著睡魔。

元日示彭器資御史

天歷開祥歲屢登。命元頒號繼熙寧。春風寒色猶燒臘。北斗杓端已轉星。初退賀班東上閣。卻觀郊樂太常廳。便期節物尋樽酒。莫問吳霜換鬢青。

再和

大禘新元詔太平。萬方承慶日神寧。壽觴別殿稱山嶽。治象端門燦日星。放仗暫騎歸舍馬。束衣還就致齋廳。史官不用占風瑞。從此豐年紀汗青。

次林御史次中韻

一鶚將從北海飛。豈如窮翼老差池。方嗟簿領迷公幹。尙喜琴音得子期。別思俄聞賦南浦。殘花猶可醉

東籬留連且此同樽酒。歸去鱸魚未過時。〔原注〕時揚州陳丞相辟君幕府。

再次韻

昔歲相從向此都。重來風物變南湖。莊生達觀嘗齊鷁。張翰歸懷豈爲鱸。世事不窮勞強勉。官期猶遠盡躊躇。新詩易得皆精好。真似元和咳唾珠。

次和次中簡留守蘇子容

離園文雅久湮淪。居守今逢紫禁臣。有客游梁似司馬。主人開閣等平津。不才亦預門生舊。承乏來趨幕府新。共喜風騷壇將在。簫韶時許擊轅親。

次韻次中喜子容還朝

公歸真足慰儒林。雲日重瞻帝闕金。聚散可驚陳跡事。行藏誰見古人心。春還漢省苔新舊。霜逼吳船水淺深。坐憶茂陵猶未去。悠悠徒有病中吟。

次韻次中題雙廟

凜凜英風數百齡。舍生知與義相形。莓苔老澀穹碑暗。雲木疏寒古殿扃。自許孤城摧虎兕。至今遺事炳丹青。二公死所真難處。獨恨臨淮有遁刑。

次和次中久雨阻行而聞浙中旱乾

積雨廉纖氣已淒。暝雲凌亂四天低。吟懷撼撼聲侵竹。歸思漾漾水拍堤。東海可能均霽日。北風曾未送

忠肅集 卷十八

陰寬應須更問淮南米莫厭留連鵠首西。

忠肅集卷十九

七言律詩

正月十一日迎駕大慶殿次曾子固韻

錦繡龍鸞仗衛新。絳袍黃繖拜行宸。天開雲日端闈曉。歲謁衣冠別廟春。歸輦順風傳鼓吹。廣街嚴蹕靜音塵。上元咫尺瞻游豫。更慰都城望幸人。

次韻和門下相公從駕幸太學

詔移清蹕下齋房。訪道天臨舜上庠。正坐橫經開鳳展。袞袍接武照鵷行。雍宮故事收炎漢。闕里施文盛素王。宜有諸生知聖作。勉趨賢路起東堂。

立春後秦祠東郊呈器資二首

走馬東郊春早時。宿雲容與澹朝暉。溪邊水暖魚初上。塞北風柔雁欲歸。君賞已誇梅白早。我來仍見柳黃微。年華恰恰催吟醉。從此朝回日典衣。漠漠陰雲曉蔽空。稍看疏霧泛冥濛。郊原脈起新春雨。簾幙寒生半夜風。縱步杳難尋舊苑。習儀聊復望祠宮。霜臺監察心宜喜。聞有精誠禱歲豐。

奉祀南郊九日馬上口占

霜意雲情曉欲寒。城南驅馬面晴川。路尋紅皺黃團舍。興入丹茱紫菊天。撼撼園林驚晚歲。紛紛場圃見豐年。君恩未報歸何日。空使荒蕪靖節田。

清明日玉津園奉陪賜宴文太師

漢燭青煙下九閭。東風瑤圃燕元臣。詔馳御屏深行酒。露翦宮葩別賜春。不爲夢魂聞廣樂。許留光景緩嚴闌。曲江冠蓋華林客。未有三師解組人。

夜直中書省寄左省子容公

膺門早歲預登龍。儉幕中間托下風。敢謂彈冠煩貢禹。每思移疾避胡公。論文青眼今猶在。報國丹心老更同。夜直沈迷坐東省。齋居清絕望南宮。〔案〕此詩據宋詩紀事補入。

次韻謝師厚齋中有感

一庭春桂與秋蘭。元禮龍門笑閉關。不使臺嚴陞級。盎然和氣見聲顏。平生懷抱風塵外。終日圖書几席間。天下蒼生瞻世德。東山寧許乞高閒。

殿廬次韻趙元考錦帶花

錦枝香浸碧琉璃。誰折芳叢下帝闈。橫島正疑豪客纜。雙垂曾見婦人衣。長條臥葉勝繁李。密葉攢英似紫薇。繁取東風留節物。還家猶及醉春暉。

次韻錢純老密學白錦帶花

天園節節見芳華。春暮重開白錦葩。鬪葉淺深瓊散葉。封條勻鬧雪圍花。玉翹舞日眞仙國。月帔垂欄上帝家。若向閩都論品第。可容滄海碧桃誇。

宣徽王公太乙宮使還洛二首

四紀翱翔覽太平。三朝出入盛勳名。對徽徽省官儀重。謁款殊庭使事清。桃李春風多惠政。鸞皇雲路半門生。少貪嵩洛鄉邦好。人望巖巖在老成。位並樞庭今四貴。官升太尉古三公。壽眉仙骨風塵外。琳館眞都祿隱中。治第頗聞齊綠野。放心甯遂伴冥鴻。滿懷霖雨功猶未。勉起行看謝傅東。

送致政太師歸洛

元豐天子賜安車。黃髮翩翩翊聖初。坐省故攜靈壽杖。會朝仍駕虎賁輿。平泉花木春常在。遼水城池鶴自如。身是赤松無一事。乳桐孫竹看扶疏。

上洛都文太尉二首

慶歷承平已廟堂。三朝勳業徧旂常。昔雖郭令曾憂畏。今比留侯更壽康。賜錢饗人移玉食。寵行天藻爛雲章。想公賸覺西都樂。門外逍遙綠野鄉。

詔書新出未央宮。始識謀深別有功。就第願陪唐九老。臨軒方冊漢三公。翩翩雛鳳仙山上。兩兩階星昴

帳中貴齒貪賢聖朝事。可須歸興羨冥鴻。

薛景庸太丞昌朝守邠州

風霜烏府不謀身。丞掾鴻樞號得人。九轉已欣丹換骨。一麾聊免甑生塵。時今關隴烟雲靜。地古岐周氣俗淳。正恐暫均勞逸去。肯容文酒戀朱輪。

次韻新陳州太守王彥祖侍郎

得郡同時下帝闈。相聞雞犬再冬春。名場步驟元希驥。官牒推移媿積薪。一笑醉餘雙白髮。千騶南去兩朱輪。勸公少樂淮陽臥。來伴林邊杖屨人。

九月十日趙韓王園同舍餞送王微之哲出守汝州卽席次其韻二首

左符初作魯山行。便有蕭然物外情。出入宦游金馬舊。平生風望玉壺清。秋花黃紫羅千本。宴豆甘珍聚百名。談笑揮毫得佳句。從容聊喜暫班荆。

雲木疏寒天未霜。一塵清不點衣裳。白鱸南國歸懷壯。黃鵠西風去路長。攬轡便看紅旆轉。銜盃聊共紫萸香。相思肯惜瓊瑤寄。時有樓邊雁北翔。

重送微之二首

瀛州日日聚華紳。舊德如公更幾人。寂寞窮經甘白首。風流投老就朱輪。光陰不負圍碁局。談笑須還漉酒巾。朝議雖知弱翁久。不如方國慰斯民。

曩昔清襟江上開。九華山色照樽罍。中間世故何勝道。晚歲仙都幸一陪。康樂又從滄海去。次公曾自潁川來。春秋墜學應猶在。聞說新書勝玉杯。

重送文與可

神標人慕紫芝眉。襟韻誰量叔度披。相與論心惟有竹。未能無意獨于詩。東風臘尾消冰雪。南浦船頭轉鼓旗。想及下車春恰恰。汀洲煙雨白蘋時。〔原注〕君喜畫竹作詩。

送益路提刑謝師厚郎中三首

鼇闕崑崙路不賒。單車聊復向褒斜。東山行止繫民望。康樂文章自世家。政在冰壺人畏慕。詔移金節使光華。百城爭欲扳遺愛。豈獨諸生戀帳紗。

叱馭靈關萬里行。爰書丹筆刺祥刑。過家舊社瞻鄉繡。入蜀何人識使星。梅福上封推變異。望之雅意在朝廷。華陰道過行臺路。共醉西湖賦鵲鴒。〔原注〕公之弟領漕京西。今往過之。

歲晏風雲劍外天。故宮形勢舊山川。地環錦繡三千里。兵後歌鐘一百年。金馬已陳公子賦。海棠應補少陵篇。官私侈快斯民病。可賀于今使者賢。

送子容二首

文人家世積清芬。二許遺風見子孫。學問共推元凱庫。衣冠爭望李膺門。西垣潤色文還古。東土留居政有恩。歸奉漢皇前席對。豈無今士所難言。

傾都冠蓋擁西圻。一節移歸四牡馳。魏闕雲烟天近處。隋河冰雪歲窮時。行藏粗識賢人志。疲拙難當國士知。妄欲與公論異日。區區何用召棠詩。

送次中

肯與衰頽論久要。愛君才偉氣飄飄。聲名桂苑曾晞驥。〔原注〕次中先一榜登科。風節霜臺媿續貂。分落江湖驚幾歲。喜同文酒駐雙橈。天寒不奈隋河淺。又使清談付寂寥。

送呂戶曹仲敏

文章盈篋幾千篇。去有山濤吏部賢。梅意向人冬至後。雲陰含雪北風天。非今是古俗皆爾。歎老嗟卑誰不然。知子已能操學誼。行藏吾欲看他年。

送虞元叟大熙出守常塗

使旗獵葉櫓嘔啞。齋舫飄如上漢槎。待得江南鱸作膾。暫從遼海鶴歸家。清談揮麈臨千里。隱几看山過兩衙。零落謫仙遺跡在。爲尋荒冢弔雲霞。

徐程致仕寄之

浩然歌笑脫青綸。高調冥冥綵服還。智達能遺名跡去。英雄宜爲泰平閒。秋風酒榼攜寒野。春雨蘭芽長舊山。養已奉親心兩得。世人行止是非間。

宿州靈壁張氏園亭舟過始知之

去國身隨濁汙傾。驚然雙漿若孤鷹。不知堤木藏金谷。但見漁人說武陵。已許生平惟水石。坐看名利僅蛟蠅。從今所至停舟問。詩酒雖衰亦強能。

八月十五日宿平原寄跋蹈

去秋今夕艤歸船。雨濕溢江歎隔年。幸此一輪開霽魄。卻嗟千里共秋天。更爲來歲悠悠約。安得清光夜夜圓。孤館悄然誰晤語。滿庭寒露濕蒼烟。

離汶馬上寄鄉中親舊

半月徘徊去魯遲。二年樽酒奉音徽。又貪聖寵移金節。還使鄉人笑錦衣。天地中間真遠客。田園蕪沒盡來歸。東州不擬多時住。已傍盧溪作釣磯。

至金鄉先寄田直孺〔原注〕庚戌六月三十日。

京雒塵埃各未湔。古城瀟灑向秋天。今朝屈指終三伏。此地銜盃已六年。老喜交朋頻把臂。拙無材力可求田。君當記得鱸魚約。何日相從上釣船。

秋浦寄田同年鯁

三月鵬雲接翼飛。歲窮飄泊動相思。獨臨谿檻看山處。正是江天欲雪時。連轡都門君不至。〔原注〕約同出都。臨行君失期。合簪秋浦我來遲。明年尙好方舟去。醉到春風有舊期。

過任城謁田直孺

古邑東風桃李殘。故人高臥白雲間。我知原子貧非病。誰識蕭生志抱關。相遇正逢春事晚。已衰難伴醉鄉閒。卜鄰慙愧當年約。依舊無錢買北山。

寄尹元佐

都城分袂下長淮。聞說靈槎犯斗回。天上夜蟾千里共。江南秋雁尺書來。莫悲琴劍猶羈客。豈有英雄老俗埃。此去玉皇恩澤異。龍飛親榜看風雷。

寄高陽陳鎬

胸中奇蘊入天淵。平昔英遊夢寐間。寶劍早因靈氣識。臥龍今惜壯圖閒。匈奴尙敢乘黃屋。漢騎新聞戍玉關。應共將軍話功業。酒酣朝夕望燕山。

寄長沙王源祖

湘水衡山冠楚西。逢君曾與勝游期。橋躋危蹬尋僧去。月滿歸舟載酒時。歲律別來驚易改。琴徽空自寄相思。試看湖上梅應老。不解東風贈一枝。

表海亭

到此脩脩欲羽翰。長簷危檻壓孱顏。高低步障千花磴。遠近屏風四境山。興爲南樓雖不淺。倦如飛鳥亦知還。偷閒擬上三年計。寧願齊侯五月間。

早春書呈溫甫用前韻

春皇消息到人間。屈指年華笑側冠。梅蕊暗黃初過雪。蘭芽淺紫未離寒。時哉物逐東風樂。老矣心于勝事難。惟有林泉隨處好。可須巖谷隱歸盤。

登照碧亭次韻燕若水

記著蓬瀛向此開。清明簾幕望高臺。老慙蒼鬢親花萼。病負春風厭酒盃。青蓋綺羅尋徑去。畫船簫鼓轉溪來。不知好事樓前客。便有嘲吟倚馬才。

憶靈泉山寄龔輔之諫議丈

不到靈房二十年。背依叢嶺面平川。風吹檜柏周遭雨。地蹙岡巒寸尺煙。合有高亭臨綠篠。恨無長甃引清泉。攜筇占得頻來往。誰似香山白樂天。

次韻余翼贈陳長史繪

變化洪纖付一陶。中楹瞻望赭紗袍。有才元子名爲汙。失意劉蕡策自高。青史異時觀壯士。黃衣何日調南曹。居閒更覺新詩好。詞力還堪僕命騷。

次韻觀棊

晝永風閒玉局平。機心相軋掌中兵。敵家只欲乘虛奪。元地何勞用劫成。縱使仲宣強記在。枉將陶侃寸陰爭。旁觀有訣君須信。大抵驕貪悔吝生。
盛陶索詩錄近作數篇以長句將之

太白谿邊思會遇。九華峯下共登臨。高樓一別江南醉。幾歲同爲塞北吟。〔原注〕己亥相遇池州。同飲于蕭丞相樓。漳浦舊懷多感慨。建安遺響未銷沈。言雖窮苦君能聽。試寫孤音入夜琴。

二月二日過吳德仁二首

清門令德江南吳。三紀蘭洲心自娛。明時中林隱君子。蚤歲東門賢大夫。老去笑談惟玉麈。病餘風韻更冰壺。世于出處罕無意。兩忘未見斯人徒。

三徑長籬依斷崖。築堂能向紫溪開。案頭日有青精飯。欄面常浮白玉醅。坐對雲山飛鳥沒。笑看花木早春回。高情不厭城中客。更許時時杖履來。

貽致政吳德仁朝請

四十懸車三十年。白雲山下古溪邊。松姿鬱鬱霜中壽。鴻意冥冥物外天。歸爲田園陶令達。化行鄉黨鄭公賢。我慙出處今如此。應得高人一粲然。

初到蘄州

卜築南城三徑開。寬恩容此養衰頽。舟從灩澦堆中出。人是邯鄲道上回。憔悴幸非蘭澤去。因緣如爲祖山來。江湖本是忘機地。笑許殘年付酒杯。

寄鼎州陶使君商翁〔原注〕近蒙示詩。

詩壇曾識舊將軍。新寄長編慰俗塵。夢到鈞天醉聞樂。心疑明月暗投人。誰悲正雅全忘古。是自淫哇每

亂真。安得高門占旂鼓。與公吟嘯武陵春。

舟次潯陽寄興國李使君舜卿

江南太守畫船飛。湘水羈鴻病翼遲。歲晏風霜時易失。人生離合事難期。相思坐歎瓊枝隔。寓意徒令玉軫悲。遙想翠屏山下望。樓中還有謝公詩。

送柳判官引對次鄒主簿韻

斯文復古魏郊東。〔原注〕仲塗先生自謂東郊野夫。落落名孫祖氣同。待詔方貪採蘭舍。最書催見受釐宮。十年罇酒瞻燕碣。幾日歌吟笑郢中。天下求才君必用。莫悲長劍匣秋風。

赤岸過柳明之別業

主人瀟灑武陵仙。別業河東大道邊。心畫美田皆枕水。手栽佳木已參天。園林有地時難者。鐘鼎銘功事莽然。倦客過門空大嚼。卜鄰安得買清泉。

青山高竹樓別業昔嘗題詩其壁詩故在而竹樓物故三年矣感而賦詩

故人別墅俯青郊。曾許幽人近結茅。苔壁雨荒留舊蹟。竹林雲矗見新梢。樓成白玉山無主。鱗出黃金客有肴。悵念同游歌楚些。風聲蕭颯鳥咬咬。

巳日泊桃源亭

桃源亭北值佳辰。桃萼飄殘碗晚春。緹幕惜芳林下子。綵衿修禊水邊人。風謠漸喜南音變。飾物偏于久

客新道不與時當勇去。歸心何必計吳萼。

病中聞子容被召次中東歸

一夜奎星向紫微。朝來黃鵠又東歸。謝庭春入新紅藥。吳苑花迎舊繡衣。疲馬顧鳴還有戀。驚鳥飛弔欲何依。無聊病況將離思。併寫孤音白玉徽。

再和

詩酒相從道久微。東西冠蓋兩將歸。許公文誥專鴻筆。太白江湖醉錦衣。攬轡慨然俱有意。繫匏于此獨無依。猶憐賸得河梁句。常與都人記盛徽。

送鄭毅夫舍人被召五首

金魚寶帶紫微仙。刺史荊州帝倚賢。仁入刑書無濫獄。政通和氣屢豐年。芝函曉下浮雲闕。奎曜宵還北斗天。士望區區翰林主。不知舟楫赴商川。

三國遺基楚子宮。洞庭游樂與民同。畫船載酒春波綠。疊鼓隨車夜燭紅。愛比南陽歌召父。學如西蜀化文翁。去思不用甘棠賦。恩在邦人骨髓中。

永昭陵上土新乾。又見弓遺四海冤。旒冕嗣天承顧命。金縢傾帑入和門。生靈困瘠悲邦釁。夷狄跳梁玩國恩。歸奉清閒疏奇蘊。席前應講太平源。

旌旗占曉動星躔。冠蓋傾都海嶽旋。歸覲明堂瞻日表。過家鄖社卜松阡。郢山殘雪梅寒後。漢水東風柳

暖天無限春風入佳句。何時珠玉看盈編。
簪紱忘懷出處均。行行猶眷楚都春。嗣皇小愆方求助。太守三公古重民。燕厦久依王粲幕。鸚書曾媿孔融賓。士儒以義酬知己。敢向東原涕滿巾。

九日病起寄文瑩

春城別去已秋窮。猶喜音書繼遞筒。身外光陰一飛隼。天南蹤迹兩飄蓬。夜烏三市驚明月。胡馬長嘶向北風。無酒無人更無菊。重陽愁過鹿皮翁。

春日書事

年華歡緒兩蹉跎。颺白浮紅日日多。酒怯病懷無舊戶。睡便春晝長新魔。些思楚客招魂語。噫笑梁生憤世歌。鳥雀相忘來亦少。不須門外更張羅。

跋罷西邑時將營山居路有二詩次其韻

半年西邑祇徒勞。天數人謀兩不饒。分定一枝難駐足。時來三組併垂腰。是非未了今猶古。飲啄誠安谷亦喬。何日一廛能負郭。杖藜春雨看春苗。
求田問舍此心勞。兩處如聞勝勢饒。張氏泉塍近城角。邵家林屋在山腰。倒冠來伴樊川杜。飛鳥新聞葉縣喬。昨日雪霜枯槁地。百般蒼翠發新苗。

忠肅集卷二十

七言律詩

孫少卿鹿頭山詩并畫圖二首

誅茅搜險旋尋真。聞說山巖一日新。佳境留連應有待。先時登覽豈無人。披榛好石來如召。隨手清泉應若神。不獨山中興勝事。幾多風愛在邦民。使君真愛鹿頭山。圖畫歌吟去爲傳。塵世那知武陵事。時人爭誦永嘉篇。行春遊醉常勞夢。按部登臨又隔年。有客平生志林壑。坐憐雙眼隔雲煙。

次韻蔡景繁紅梅三首

故人江驛寄瑤華。紫玉枝頭散嫩霞。日暗露桃春尙淺。醉餘妝面粉難遮。綠溪地靜東風過。雕檻香寒曉月斜。水滿琉璃聊自喜。不堪塵眼祇空花。蕭疏仙梗擢芳華。巧刻圓瓊傳淡霞。素質本非桃杏比。酡顏聊避雪霜遮。香含暮雨欄邊散。豔倚春風鬢上斜。聞說樽前偏屬賞。青黃朱粉更無花。仙圃瑤林冠物華。靚英明媚洗晴霞。酥裝卻費臙脂暈。紈扇應煩絳粉遮。天上念奴春睡足。風前飛燕舞

容斜。後房宜勸歌聲小。愛惜今年第一花。

再次紅梅二篇兼簡李質夫二首

色不天穠始是華。仙家林觀倚雲霞。春酣白玉醅香入。日射紅鸞扇影遮。攢萼亂鬢能淡佇。抱枝寒萼更疏斜。閨都誰與論高下。未愧蟠桃賞碧花。春工著意與年華。換白添紅翦絳霞。肉色膩勻宜日上。天香清冷怯霜遮。半臨綠岸湘波動。巧映朱扉錦徑斜。爲寄瑤林主人語。爭妍應有曲房花。

庭前有古槐一株枝葉扶疏廣陰一畝每當月夕風晨輒爲婆娑其下空翠沾衣心神清越感秋寄興情見乎詞

綠玉交柯蔽鬱深。碧羅褰幄靜沈沈。最宜初旭晞晴靄。時有珍禽宅翠陰。終日對爲佳客伴。幾年相慰故谿心。主人已有秋風興。更聽疏蟬抱葉吟。

盆中移白菊

九秋風露下星榆。玉刻圓錢散曉株。人住水涯多白髮。地應花谷近清都。按香漬酒登新譜。〔原注〕君倚以菊釀酒。益氣輕身載舊圖。移取黃堂朝夕見。北洲亭遠故臺蕪。〔原注〕郡中舊有白菊臺。今荒廢。

次南陽錢紫微白菊

清根靈氣本仙通。白玉葩華綠玉叢。山遠莫尋幽谷水。洲香聊近百花風。神寒縹緲梅同格。英出繁多雪

媿工。〔原注〕菊英二十一出。籬下區區醉金盞。鄜鄉應笑鹿皮翁。

次韻傳推官十月菊

應憐陶令愛東籬。分付黃花特地遲。百卉浪隨秋色盡。孤芳自與歲寒期。冷香直欲梅相鬪。金盞懸知雪更宜。空使詩人詠重九。天公造物本無時。

輓慈聖光獻皇后二首

翼子詒孫廟社功。憂勞嘉祐治平中。澤流自配皇圖遠。仙去誰期壽劫空。三獻奄違長信殿。萬神重會永昭宮。母儀五十年間事。愁入西郊鼓吹風。
孝孫皇帝念終天。毀墓難留玉座遷。廟諡易名尊四字。宸闈行服自三年。寶衣鸞鳳藏華殿。哀仗星辰下洛川。從此都人想游幸。無因重見九龍輶。

輓資政殿學士吏部尙書曾公二首

懷詔歸來望九霄。依山纔隔渡河橋。履聲未徹君王聽。車左俄悲道路招。韋氏詩書傳舊閱。石家孝謹冠中朝。靈輜聞說都門過。愁向西風徹鼓簫。
百歲悲歡俯仰間。訃驚疇昔涕洟瀾。柱堂天聖傳先契。蘭省元豐事長官。寂寂塵書華屋閉。蕭蕭雲木故山寒。深心令德今何愧。付與無窮後世看。〔原注〕禮諸侯行而死于道則升其乘車左轂以其綏復。先子出宣靖公勝下。元豐乙丑。資政前爲吏部尙書。時某其郎中也。

輓宋次道二首

囊筆周旋侍漢宮。博知前載問無窮。朝廷人物儒林丈。家世文章太史公。俯仰頓驚華屋換。聲容徒望總
帷空。寢門一哭何嗟及。付與悲哀挽繹風。
平生襟尚苦清通。白首耽心翰墨中。萬卷囊書推沈氏。一時碑字貴顏公。塵栖材館稀賓至。山抱佳城與
祖同。已矣善人那復見。蕭蕭溱洧祗秋風。

哀呂西臺行父四首

大夫門戶斗魁旁。落落南宮舊望郎。收斂壯心書萬卷。沈浮高興酒千觴。乘驄始欲新年去。藏壑俄驚半
夜亡。索我贈言曾未暇。哀懷今變紉人章。

仙骨蕭疏古柏秋。心于塵世合悠悠。人間未熟黃梁飯。天上新成白玉樓。隱几不聞遺治命。飛旌何日向
西州。識君惟有崔夫子。(原注)伯益預說衣冠一蛻留。

前月南河欲放船。壺觴一笑暫盤桓。唾霏珠玉音猶在。風折篋囊墨未乾。皎皎不應隨物轉。滔滔從此締
交難。孤懷幽調誰知者。寂寞金徽不復彈。
吳興空望使君車。道厄陳州亦命歟。歸路自爲兜率去。遺忠誰訪茂陵書。批糠世俗心無累。蘭玉階庭善
有餘。一束生芻猶未致。春風洒淚滿襟裾。

五言絕句

次韻唐誦植櫻欄三絕句

亭亭圓榦直。翦翦翠輪齊。葉散夜叉樣。惡名誰品題。
榮悴逐時序。紛紛紅翠多。誰同歲寒操。旁有羽林戈。
種蘭不當戶。李以苦見容。珍重主人意。東亭非要冲。

次長守長歷兩孫自汶寄詩韻

阿守似其父。敦龐仍秀疏。拜翁猶數月。書驛且渠渠。
歷也駒千里。新詩慰遠思。霜秋魚酒美。來趁壽觴時。

七言絕句

戲簡許教授

雖有齏鹽甘寂寞。如聞麤粥更艱辛。莫將秉釜論多少。聊爲君家拂飯塵。

馬融絳帳臺

漢守曾爲絳帳師。升堂高弟許摳衣。傳經無復當時事。只有沙禽自在飛。

國風亭

地靈真合有清辭。正是中和樂職時。誰道渚宮吟不盡。試看亭上國風詩。

復古亭

功大文雄歲月深。巍然高碣字生金。臺池得與吾民共。誰識邦家復古心。

穿楊亭

華構輦飛一望中。顏間篆墨揭秋風。休矜百步穿楊巧。未及當年射虎功。

迎春亭

亭接東風近曉霞。幾多和氣到萌芽。也知當日迎春意。不爲松筠只爲花。

朝宗亭

亭下長江走浪花。朝宗東委去無涯。何時上漢風濤穩。待泛仙人八月槎。

激心閣

危欄倒影下千尋。空水無聲萬象沈。試問登臨來往客。幾人澄得利名心。

七瑞堂

草木生成亦偶然。誰將枝幹驗祥編。如何併作當時瑞。寂寞于今五十年。

水舫

天水相將遠欲無。扁舟雙槳似飛鳬。此身未是逃名客。且學鷗夷泛五湖。

雙橋

雙橋十里跨虛明。波面無風兩足輕。雨歇烟收人不見。路岐依約是蓬瀛。
十月六日與客游金山乾明宣塔戒壇彌勒舍利廣教七山寺三首
水落溪橋霜未寒。岡林平淺是西山。路穿峭嶺青葱底。寺在崎嶇屈曲間。
排門金碧七禪關。松閣相望石徑連。不爲勤求善知識。可能一日徧諸天。
行徹雲煙到上方。青林深壑對重岡。山中底處饒風月。要著江州一草堂。

偶作

春氣未強寒慘慘。羈人多病興寥寥。閒愁付與毫端遣。長日期于局上銷。

次韻張供備達夫觀回雁峯二首

圖志分明傳者謬。峯名元在嶽山隈。邦人試看春巖上。豈有燕鴻到此回。
林麓坡陀湘水側。煙嵐朝暮楚城隈。峯前遷客翻堪笑。不及飛鴻一歲回。

樊山口二絕

洲背巖巖亂石排。濯風寒浪踏蒼苔。長江萬里從西北。瀉向幽人兩足來。
無數江鷗似雪霜。暫來還去俯滄浪。幽人已自忘機久。卻恐窺魚意未忘。

九日依唐生韻五絕句

三歲重陽負玉觴。悲歡不定客途長。年光節物真虛擲。賴有新詩付錦囊。
白醪趁節醅已醺。黃菊候霜花未開。獨上荒城拱雙袖。風雲慘慘雁聲來。
無處登臨百尺樓。若爲銷散仲宣憂。拒霜寒菊常煙雨。愁滿江城冷澹秋。
悄悄登山臨水興。紛紛泛菊佩萸人。不須吹落簪花帽。但願常存漉酒巾。
長松老桂風霜足。細草幽花雨露霑。天寒日下音書少。雁自高飛魚自潛。

次韻燕中舍若水苦雨五絕句

湖水漫漫日夜添。芡芒蒲鰕鬬尖鋸。不須更苦雨多少。且喜西牕青入簾。
風欺炊竈晨煙重。泥隔賓車午枕高。誰記幽人張仲蔚。都將三徑付蓬蒿。
池蛙聯絡聲方旺。逕草縱橫勢未鋤。不厭微涼生枕簟。只憂新蠹入圖書。
聲入高梧翠竹邊。故攜枕簟北牕前。無端喚起江南夢。記得扁舟夜不眠。
嘉穀連空指歲豐。幽潛無復有乖龍。何時浩蕩風吹日。照徹陰雲幾萬重。

泛舟南湖二絕句寄公秉

路轉芳洲面面風。回環慙媿刺船翁。畫橋東北桃花塢。時有飄紅落酒中。
不知芳物過春風。傲兀扁舟愜浪翁。得似王猷剡溪上。何須范蠡五湖中。

木芙蓉

誰染輕紅皺萬囊。靚如妝面照寒塘。蜀葵千葉仍陪菊。芍藥重臺更耐霜。

湖上口號三首

綠荷深不見湖光。萬柄清風動晚涼。莫恨紅葩猶未爛。葉香元自勝花香。
湖上清懷各自知。涼風吹我獨依依。吏曹姑去毋催我。待得臨流弄月歸。
柳色映花春岸北。人家臨水畫橋南。回舟卻向東城望。恰似清溪玉鏡潭。

六月二十日湖上四絕句

蓮的紛紛玉手來。旋攀蓮葉卷狂盃。水漿未見菱腰折。珠寶何時芡背開。
紅蕖白藕塞平湖。曾愛新梢玉不如。今日水深那可得。野人盤上欠香蔬。
氣候淒炎頃刻中。晚涼宜此一樽同。乍收荷葉蕭騷雨。便得蘋花細碎風。
濃雲忽忽遍天圍。四面涼風弄客衣。霹靂一聲湖雨白。魚兒驚沒鷺狂飛。

雪中次韻王鞏廷平四絕句

此時遙憶子猷家。幽興應思剡水涯。未向東風見瓊樹。且傳春色贈梅花。
漸飛大片紛紛如。更撲驚風亂似麻。爲謝妻孥衣但典。莫愁米貴酒難賒。
簷邊騷屑竹聲乾。爐畔龍鍾病骨寒。坐想蘭歌傾桂酒。清虛堂上有餘歡。
〔原注〕君之西齋。

袁安祗有高眠興。謝朓空傷後會艱。十萬健兒春瘴近。飛花宜過海南山。

平原君

徒稱館舍三千客。豈據長平百萬軍。焉在平原多得士。功名翻屬信陵君。

信陵君

徇趙亡梁久不歸。先王宗社若巢危。歸來未久秦金入。魏國存亡亦可悲。

甘羅

甘羅徒挾虎狼威。入趙安能策是非。大抵諸侯畏秦爾。一言輕得五城歸。

汲黯

汲黯剛純社稷臣。張湯巧詆更平津。賢人所貴忠邪異。惜對君王論積薪。

次韻龔諫議輔之同遊靈岩寺

琳宮仙老鬢雖霜。不厭山頭石徑長。杖屨更爲他日約。姓名聊記舊碑旁。

戲李質夫

曾醉江梅爛漫時。北鄉寒冷見花遲。知君獨倚瑤林賞。不向春風贈一枝。

再贈李質夫

贈春須記折花時。坐恨江南信息遲。還向瑤林主人問。東風應傍去年枝。

絕句

日日新詩出錦囊。清才飄灑句琅琅。幕中病客疲酬報。走馬真難伴放羊。

東郊次韻器資子開六絕句

幾年空有憶梅詩。常恐江南驛使迷。慙媿一枝償病眼。春風須勸笛聲低。刻玉沾酥三兩枝。霜空林杪早春時。蕭疏仙骨閒相並。縹緲幽香冷自知。江南詩客兩仙才。攜手東原賦早梅。瓊樹令人常願見。還家何事不徘徊。

右見早梅

五日重來躡馬塵。比君時節已殘春。吹衣拂面寒猶峭。誰道春風似故人。悄悄輕冰斷水涯。欣欣羣木媚人家。春風巧思無尋處。紅白青黃各自花。昔年花卉爛春林。今日重來老病侵。歲月漫爲流俗歎。行藏誰見古人心。

右護成

九月十八日離魏都寄內二首

南鴻無計與同飛。鴻翼翩翩我馬遲。若過平臺寄家信。爲言今日是歸期。肅肅霜風吹客衣。客懷多少寄金徽。到家細說淹留事。應笑蘇秦困始歸。

寄倩

近時頗少飛鴻信。幾日應占喜鵲聲。相見使須持寶鑑。爲翁衰鬢摘霜莖。

題齊己草堂

一曲流泉對草堂。何人與續帳前香。清詩自共秋風老。依舊鐘聲送夕陽。

忠肅集拾遺

上哲宗乞召用傅堯俞等以銷姦黨疏

臣備位左右。憂深責重。雖夙夜盡瘁。恐終無所補報。竊謂國家先務。莫如得人。近臣事君。唯有進善。臣伏見知陳州傅堯俞。知齊州王巖叟。知潞州梁燾。通判虢州張舜民。知廣德軍賈易。皆早蒙陛下識擢。分在言責。不幸志業未伸。謗嫉橫作。罷職補外。各已數月。按堯俞等皆忠直之臣。守正不撓。在職未久。知無不言。此固陛下素所獎愛。必未棄捐。然臣私憂過計。恐有補外漸久。朝廷漸亦忘之之日。不避僭越。輒效一言。夫人不同。所用亦異。或長於政事。或善於文學。或言語侍從。或行義師表。今多士盈庭。於此數色。固無乏事。至於公忠朴直。不避仇怨。不附朋黨。一節自守。可當大事。肯爲國家効死守法之人。則非獨今日難求也。從前世以來。不易得也。譬如人之一身。耳目手足。肌膚爪髮。闕一誠不可。然而強四支者。必以骨爲主。故自古人君崇獎忠直。謂之骨鯁之臣。傳曰。山有猛獸。藜藿爲之不采。言猛獸在山。則山中之物不敢犯者。如直臣立朝。則姦佞有所畏憚也。今堯俞等皆有骨鯁大節。公論所重。邪黨所畏。況當今陛下明辨忠邪。汲汲進賢之日。而反使數人流落外郡。爲姦邪所快。臣實痛惜。兼觀近日言路。稍異有昔。雖章奏交上。議論不少。然而推薦者非豪強。則親舊。所排擊者非孤寒。則怨隙。朋比之心。公無忌憚。陛下試取近來言事章疏。密察其意。其間心出於至誠。言出於忠信。憂國如飢渴。謀議知大體。有如堯俞者乎。孤立不

懼彈劾權強赤心。事上略無私意。有如巖叟者乎。守正堅確。不憚大吏。不黨同列。嫉邪指惡。有如舜民。蠱及易者乎。以此驗之。真僞立見。今聖明在上。方修善政。而羣小不快。爭進於下。布列朋黨。造作謗議。欲以傾陷善良。動搖政令。紛紛籍籍。甚可懼也。然上下相罔。誰爲陛下辨之者。當此之時。唯且收聚人才。使在朝廷。若正直之路廣。則邪枉之志銷。而治道成矣。臣疏賤拙直。天下無毫髮親黨之助。獨蒙二聖選拔。致位於此。恩至厚矣。則報效之心。豈宜自比衆人。故當知無不爲。甯敢避罪。臣願聖慈深賜省察。特發睿斷。召此數人。忠正之臣。入備任使。以慰公議。以消朋黨。幸甚。

貼黃呂公著等亦會同議此數人。皆與臣意無異。但以未測聖意。所以未便奏陳。故密獻此言。若候因臣僚進擬而後召之。卽不若特降中旨。付之三省。庶使恩命出於陛下。元佑元年十一月上。諸臣奏議五十四。

張文定玉堂集敍

甚哉辭之不可以已也。夫萬事異理。非言不命。四方異情。非解不通。詩不云乎。辭之輯矣。民之洽矣。傳亦有之。子產有辭。諸侯賴之。是以君天下者。必使其臣贊爲辭。而後出之。周御史掌贊書。漢尙書作詔文。此其官之見於古者。歷代因之。其任愈重。夫以堂寧之一言。行乎四方萬里之外。不高深簡嚴。不足以重王體。又欲其誠之宣。不優柔曲折。不足以究民聽。又欲其言之約。三代而上。經聖人所定。不可尙已。三代而下。作者汗隆。隨時屢變。其間承平之時。訓辭深厚。號令溫雅。有古風烈。而傾側之際。書詔所下。武夫悍卒。

揮涕感動。終於享好治之譽。建持危之功。則潤色之效。豈小補哉。自慶甯至於熙甯。雖仁祖恭儉寬大。英祖克篤前烈。主上長駕遠馭。略不世出。三朝政績。巍巍煥煥。非尋常耳目所能觀聽。而於斯時典冊告命。多出公手上。上之仁心德意。國之威福所指。明布諭下。昭如日星。學士大夫。都邑野人。莫不曉然知治道之。所以然。雖政績固自卓越。而述作之妙。知有助哉。至於供奉歌頌。祠祝贊戒。勒之金石。播之樂府。多者千百。少數十言。體制紛紛。各得其度。衆人不給。我獨贏餘。又何其富也。

王開府行狀

維王氏得姓于周靈王之子晉。晉既仙去。而世人指其族曰王家。其後翦以秦將顯。東漢有處士霸。霸生孫甲。徙居于祁。自是太原王爲著姓。元魏時。固爲廣陽侯。侯二子神念神感。神念避亂南奔梁。神感北事齊。而其家散處宋鄭間。子孫蕃盛。至不又徙開封陳留之通許鎮。鎮後爲咸平縣。今爲開封咸平人者。公之高祖也。世以貲雄。曾祖太師公。祖中令公。皆好義周急。畜德不顯。至考韓國公。仕爲江甯句容縣令。後以公貴。贈皆太師封大國。追封曾祖妣李氏。義甯郡太夫人。祖妣張氏。同昌郡太夫人。妣張氏。同昌郡太夫人。趙氏。會甯郡太夫人。李氏。吳興郡太夫人。公。吳興出也。少奇警。力學。能文詞。天聖八年。舉進士。仁宗廷試。以爲天下第一。時年十九。拜將作監丞。同判懷州。改潁州。以吳興憂去官。繼丁韓國公憂。居喪摧棘。杖乃能起。景祐二年。服除。改祕書省著作郎。直集賢院。建言朝享太廟祝文。著后姓非是。請止以諡別之。廢后郭氏卒。詔葬以后禮。既啓。載天子以上元御樓觀燈。公以謂春秋晉大夫智悼子卒未葬。公燕于寢。

杜實諫止之。君于臣義且若此。矧后生雖見貶而死。被尊禮。宜有恩也。請罷元夕燈燕。俟十七日遣奠。仍禁士庶聲樂。三年。充三司鹽鐵判官。賜緋銀魚袋。五年。權同修起居注。轉右正言。寶元二年。知制誥。充北朝正旦國信使。明年。賜三品服。判太常禮院。同知通進錢臺司。兼門下封駁事。問知審官院當三班院。公言。廣南幅員千里。鄰控蠻獠。而節制所總。止桂廣二州。追阻勢離。蠻或窺犯。緩急不及事。請倣唐制。以東路之廣潮。西路之桂容。豈分五管以密援。疏上不報。其後十年。儂智高陷廣州。又二十年。李正德陷邕。廉欽。于是人思公言而服其識。明年。充益梓路體量安撫使。是時兩川荒饑。公私凋殘。既至。奏蠲逋負。閱官吏良否。多所進紓。之人大慰。說蜀郡媼某氏。多貲無子。一孫才數歲。媼意以貲厚其弟。顧難于其婦。乃詣郡誣婦不善撫吾孫。願出之。獄具。公至。立姑婦于庭。置兒其間。兒急趨母。公曰。豈不善育也。媼伏誣狀。又里民孫氏產刀鉅萬。死而子幼。其妻念門戶事。請其兄經理之。嫉者或告其畜禁物。州用坐長法。以徒當其兄。且誣其妻不睦于夫。常祀神呪詛。將以義絕出之。公曰。良人已歿而妻以罪出。甥家犯禁而舅爲共犯。非禮律意。聞見所無。皆奏正之。二事。蜀人夸以爲神明。未還。拜翰林學士。慶歷元年。知審官院。明年。同知貢舉。契丹之盜邊。常爲塘水所限。是年春。其使劉六符謂館伴賈文元公曰。南朝塘濶。何爲者也。一葦可杭。投簞可平。不然。決其隄。十萬土囊遂可路矣。時言事者亦請涸其地。耕以養兵。仁宗以問公。對曰。兵事尙詭。彼誠有術。不應以語敵。此六符夸言耳。設險爲國。先王所不可以已。而祖宗之所以限敵騎也。仁宗深然之。其後神宗復嘗問之。公對如是。神宗曰。正朕志也。是北敵以王師問罪。元昊故謀爲牽撓。勒兵

境上使六符爲不可得之求耳。七月，富文忠公再報聘。旣行，繼有詔附文忠以賜六符。文忠疑國書與政府口宣及詔語或參差，至中路啓書果異，遂倍道馳還，叩閣門請對。公方考試後殿，仁宗急召諭之曰：「毋須同列往，獨視之。」公歸院與文忠議，一夕易其書詔，大要以強中國絕後日牽制爲意。前此敵書有太宗皇帝于有征之地才定并汾以無名之師直抵燕薊之語，一時莫知所答。公獨請問曰：「臣知其故，因奏書云：太宗嘗駕并郊，匪謀燕壘，于是貴國刺梅里求致書行在，而反潛假其援兵，旣交石嶺之鋒，遂舉薊門之役。仁宗喜曰：乃自有本末。論執政曰：非王某該詳故事，殆無詞也。」十月，敵泛遣蕭階來議事，公實館伴。階因請爲我禁元昊犯邊，而指在求賂。是時朝廷亦已厭兵矣，及階行，燕于班荆，始詔公許階，誠能約束元昊，則常班師，可緣詔語付階。公以詔書予之，使常得持以邀我非使，但詳諭階而已。還奏之，仁宗善之。曰：「唐之回鶻恃功，王室難制，幾有之也，轉起居舍人。十二月，知開封府，踰日都城肅然。明年上元，故事籍嘗爲盜惡少，每至是拘之獄，公呼諭遣之曰：「倘更爲官得盜，當除爾籍，皆拜而去。五夜無警。三月，以諫議大夫拜御史中丞，李用和以元舅除宣徽使，意不滿不謝，居數日，除彰信軍節度使，同中書門下平章事。公言杜審瓊太祖太宗舅，事兩朝有勞，然終不至宣徽使，祖宗所以保后家也。用和無功貪驕，而陛下名器聽其所欲，恐非所以全安之，欲報母后厚賜之可也。兼判國子監，請開錫慶院以廣學宮，因請車駕視學。夏文莊公經略西師久無功，移疾歸淮西，未幾召爲樞密使，公言竦無忠諒之節，專爲身謀，當要重之任，不深惟報効，而以疾爲辭，今遽擢起，是避事爲得計也，無以厲世。又入對極論之，而仁宗未省遽起，公

引帝裾畢其說。遂罷竦。石介作慶歷聖德詩所頌一事也。蘇舜欽子美監進奏院。鬻故牘得緡錢數千。夜召朋友宴集。客或爲傲歌。有醉臥北極。遣帝扶周公孔子驅爲奴云者。公彈劾之。遂坐黜。又言中書樞密院總天下機務。職分不明。執政之臣勞而無功。日五鼓趨待漏院。閱文書以待陞奏。退集議。歸近已午。數刻之間。占書施行未既。已逼再集。講明日事矣。酬酢有不逮。何暇安危遠慮哉。古所謂三公坐而論道。作而行之。謂之士大夫。則繁簡固有節。奏請以今事細例。孰者歸之有司。仁宗旣用公之議。升章獻明肅章懿章惠皇后。祔于真宗廟室。因言藝祖孝章皇后嘗正位號。而祀別室非是。亦請升配。時不見用。至元豐中卒。如公議。李良臣陷于敵。數年來歸。議增六室。復閣門故職。公言良臣雖能終自拔。前不死戰爲賊俘。實有罪。今加賞敘。無以示後。李廣漢名將。陷匈奴得還。議當斬。贖爲庶人。蘇武不屈節。白首歸漢。才得典屬國。古之馭將法義如此。良臣宜待後效。與國僧紹宗鑄鐵象。妄言災福。惑衆聚財。士女傾赴之。以金銀器飾投諸冶。中貴人督作。宮掖出貨佐之。公以爲西師宿邊。而財費于不急。動士心。起民怨。詔立還中使禁止之。又言四月朔太陽常虧。經典所忌。請罷游幸西苑。諸后旣升祔。賜羣臣帛有差。以公由翰林學士遷。特命倍賜與學士等。公曰。不敢以臣廢法。屢敦諭訖不受。天章閣待制滕宗諒帥慶州。以邊事用度無藝。軍費幾屈。公累疏之。遂宗諒岳州五年。官伴北朝回謝使。六年春。復拜翰林學士兼龍圖閣學士。權三司使。公言太祖時兵十二萬。太宗時十八萬。章聖時四十萬。今遂倍之。兵在精不在衆。冗數坐食非計也。三司雖總財用大計。而事實在外。請太原大名永興帥臣各帶計置一路糧草。是冬請補外。改侍讀學士。

兼龍圖閣學士。知亳州。改鄭州。明年三月。轉給事中。七月。移澶州。明年。拜尙書禮部侍郎。坐舉張得一罷職。是年。河朔大水。民流亡。朝廷分河北爲四路。冬。置帥。公以本官充高陽關路安撫使。知瀛州。至則爲方略。振哺全活甚衆。皇祐元年春。復兩學士。五月。充永興路都部署兼安撫使。知永興軍。七月。改河南府兼西京留守。十一月。轉戶部侍郎。河東安撫使。知并州。兼本路計置糧草。四年。還朝。知審官院。充翰林學士。承旨。兼侍讀判太常寺。公在經筵。每進讀。必以古義反復勸上。以傳當世之事。仁宗于邇英閣置太原經蓍草。願曰。宮中每閱此。卿亦知其說乎。公具對本末。因曰。願垂意六經正史。此非帝王所宜學。翌日。已徹去。五年。知貢舉。至和元年。充三司使。充回謝北朝國信使。見敵主于混同江。敵每歲春。帳于水上。置晏釣魚。惟貴族近臣預。一歲盛禮在此。每得魚。必親酌勸公。又親鼓琵琶以侑之。謂其相劉六符曰。南朝少年狀元。入翰林十五年矣。吾故厚之。使還。除宣徽北院使。言者以公是行。遇正旦。使宋撰于靴淀。選與敵使爭不直。公實與會。卽改端明殿學士。知永興軍。嘉祐二年。移秦州。羌族瞎藥木征。唃廝囉。連衡更出。歲爲邊患。公以威信誘服。皆請吏修貢。西境無事。知河南府。知定州。八年。英宗卽位。拜兵部尙書。治平二年。知大名府。兼北京留守。京師大水。公上治平政鑒十篇。大概謂宜寅天尊祖。慎威福。判眞邪。愛民肅兵。以答天誠。神宗卽位。拜太子少保。遣中使李舜舉詔曰。卿曾獻忠先朝。今宜有輔不逮者。公約政鑒之義。上聖政備覽十篇。明年。檢校太傅。宣徽北院使。再任。熙甯初。西邊久無事。而疆吏產謀造端。公極陳所以綏懷之者。夏人果使橫山族殺保安守將楊定。繼遣使以其主諒詐計至。公請選勇辯士詰取害定者。羌果送

之戮于境上而受其使。未幾邊將又遣兵攻羌境。羌復犯我慶州。我亦取其蒙古城。公知邊患未有艾也。復上疏言。章聖得潘羅支而繼遷之患息。仁宗得唃廝囉而元昊衰。今橫山五族與吐蕃董毡等衆族。世受王命。今宜以恩信深結之。可得其用。是夷狄攻夷狄之道也。又請按求唐韋堅裴耀卿水運以實關中。唐引粟江淮爲回遠。今可漕太倉粟。則比唐爲易。其言道路甚悉。常因日蝕。上天下形勢。憂勤啓聖。爲政先後三論。召還。有大臣語公曰。今大新百度。能少默當進矣。公謝曰。士固欲得位以行其志。然未聞枉志以求位也。遂論新政。謂青苗助役。皆縣官漁利。謂諸役法困民。惟衙前籍上米石使相助。若可行以代吏祿。然是竭良民以養浮浪。公于是不得留京師。去留守南都。四年判河陽。五年再判河南府。八年還朝。兼中太一宮使。言天下兵分隸所謂三十六將。臣觀其人。皆鬪將而已。倉猝當誤事。又言國馬大事。監牧不可廢。交趾襲邕管。罪不可赦。宜募兵江湖。使習風土。便器械。賦芻糧于荆閩。則無勞費。公懇求閒退。章八上。元豐元年。檢校太尉。南院宣徽西太一宮使。賜金方團帶。先塋得置寺。皆異禮也。歸居洛陽。面辭陳天下利害。有人所難言者。自執政而下。侍從館閣士大夫。皆爲詩以美其行。三年。替出西方。詔求直言。公上疏。大要以愛民省事爲本。願振滯淹。伸冤枉。蠲逋負。秋大享明堂。詔入陪祠。旣畢事。召對曰。北門常須舊德而卿故治也。當再勞臥鎮之。又屈指數日。某年召卿歸矣。時三路籍民爲保甲。下戶皆不免。日聚教之。提舉官禁令苛急。河北保甲往往爲盜賊。百十爲羣。州縣不敢以聞。公極論其弊。謂非止困其財力。害其農業。所以使爲不良者。法驅之也。將恐浸淫爲大盜。可憂。願獨裁下戶。于是主者指公沮法異國論。公

曰此老臣所以報國也。章八不已。天子始悟保甲之爲盜也。六年三月。拜安武軍節度使。再任。八年三月。今上卽位。拜彰德軍節度使。公再至魏。前後求退。章累上不許。七月。寢疾。詔遣中使挾國醫臨視。二十三日。薨于府第之正寢。訃聞。兩宮驚悼。遣使慰卹。賜予甚厚。又朝中貴人護喪歸洛。以開府儀同三司告其第。公儀觀端秀。動容步武。皆有規度。語韻如鐘。于書無所不觀。博雜涵茹。而折衷于孔氏。爲文章渾厚清偉。尤長于比事。儷辭。平生奏章。皆自爲之。至老不以屬人。對賓客喜清談論文。誦講古人詞草及國朝典故。少遭天下無事。仁宗嚮意經術。獎用文學士。公翺翔出入。論思謀謨。知無不言。言無不盡。指切權近。發明時政。無回隱。侃侃諤諤。白首逾壯。故逮事四朝。多見納用。而眷遇深渥。在朝廷清塗要地。踐履周遍。外之名都大鎮。多再至者。所至首訪民所同患。所同欲。廢舉之專。以愷悌之情。與人休息。人是以安樂之。去而思之深也。兩蜀魏定。皆立生祠。士大夫皆曰。王公之志。雖不得坐廟堂行之。然內外五十餘年。凡詔告于上。設施于外。其及物者蓋多矣。累典貢舉。遇士有大體。號爲得人。公少喜道家說。其于頤生練氣。蓋有自得之者。故年益高。神明益彊。臨終且索筆草奏。求輿疾歸洛。奏成而目瞑。詞氣不亂。或泣于傍。猶搖手止之。兄弟十人。從子孫衆多。以公官以公嫁者數十人。疏族寒士有謁必厚之。薨之日。橐無餘貲。而孫猶未有官者。公娶薛氏。資政殿學士簡肅公之女。追封平樂妹。今封和義郡夫人。子男七人。未名而卒者四人。仕而卒者二人。曰正甫。奉議郎。曰端甫。大理評事。次曰晉明。今爲承奉郎。女八人。在室而卒者三人。嫁朝議大夫程詞。恭朝奉郎任公裕。孫亞卿而卒者三人。今二人之婿。曰節度推官石宗彝。宣德郎呂希亞。

孫男七人。秉文景文。並承務郎。敏文假承事郎。賁文尙幼。餘早卒。女三人。曾孫男女三人。公所著內制外制集各五卷。奏議十卷。文集七十卷。王氏世葬開封府開封縣之蘇村。至公始葬其考翰國公于尉氏縣之柏子岡。今又卜之地。得于河南府河縣教忠鄉府下里。而日得公薨之年十二月之甲申吉。乃葬公焉。公舊名拱壽。唱第日。仁宗面賜今名。謹具公世系官事始終。上尙書省移于太常。告于太史氏。謹狀。

